


鴻書


十一之五



漢書門類			
三	九	〇	號
二	四	三	函
〇	冊	架	冊

內閣文庫			
三	〇	〇	漢
三	二	五	書
七	〇	〇	類
函	冊	號	類

內閣文庫			
番號	漢	3050	
冊數	20 (3)		
函號	367	51	



第十一卷

世系部二

淺草文庫

帝王發蹟

天子始稱

受瑞而生

五十九姓

十一龍君

分長九州

播種嘗毒

禹仙化熊

驚我兒

點檢天子

朱

趙丞

索玉牒

孝廉狀元主

待宗三善

姓名祿

苗裔

二女

袁康

馬楊

京房符洪

起宗

賜姓

浮石

唱名

蠃甲

羊角

蜀多奇姓

劉氏鴻書卷之十一

明 宣城劉仲達 纂輯

世系部二

太史湯賓尹 刪正

帝王發跡

說文曰古之神聖之母感天而生子故曰天子春秋花
命苞曰女登生子人面龍顏始為天子帝王世紀曰神
農母任姒有嬌氏名女登則天子之稱自炎帝始太平御覽
華胥履大人之跡而生伏羲女媧感璿光而生顓頊慶
都與赤龍合而生堯握登見大螭而生舜虞脩紀見洞
流星而生夏禹夫都見白氣貫月而生殷湯大任夢見

長人而生文王顏徵感黑帝而生孔子劉媪感赤龍而生漢祖微子感牽牛星顏淵感中台星張良感狐星樊噲感狼星老子感火星若此之類皆聖賢受天瑞相感而生也

天皇十有三君地皇十有一君人皇九君是謂三皇其次五龍之紀一姓五君攝提之紀凡五十九姓合雒之紀凡三姓連通之紀凡六姓叙命之紀凡四姓是謂五帝玄覽

地皇氏岳姓鏗名出下熊耳龍門之山馬蹠收首十一龍君迭辟繼道各萬八千歲主治荒極雲章載持逮天

協德與地侔資太始之元上成正一不生不化覆却萬物得道之乘立乎中央神與化游鸞集龍興草榮木替亦號萬齡路史

人皇兄弟九人分長九州各立城邑比一百五十世合四萬五千六百年人皇胡沘其身九章龍軀驤首而達腋裁山川爲九圍九男別居一方號居方氏爲人立命守一得妙人氣自正爰後風雨以御六氣昭明神靈充際無臬爲世之日與兩皇並隆謂之泰皇者以其阜民物備君臣政治之足貴也遠古記

古者民茹草飲水採樹木之實食羸蚌之肉時多疹病

毒傷之害神農乃教民播種五穀相土地之宜燥濕肥
磽高下嘗百草之滋味泉之甘苦令民知所避當此之
時一日而遇七十壽淮南子

禹得道仙人也古有大禹女媧十九代孫大禹壽三百
六十歲入九嶷山仙飛去後三千六百歲堯理天下洪
水既甚人民墊溺大禹念之乃化生于石紐山泉女狄
暮汲水得石子如珠愛而吞之有娠十四月生子及長
能知泉源代父鯀理洪水堯舜知其功如古大禹知水
源乃賜號禹遁甲開山篇禹娶塗山氏治鴻水通環轅山化
爲熊謂塗山氏曰欲餉聞鼓聲乃來禹跣石誤中鼓塗

山氏往見禹方作熊慙而去至嵩高山下化爲石禹
歸我子石破北方而生啟淮南子

隋高祖母呂氏以大統七年六月癸丑夜生高祖於馮
翊般若寺紫氣充庭有尼來自河東謂皇妣曰此兒所
從來甚異不可與俗間處之尼將高祖舍於別館躬自
撫養皇妣嘗抱高祖忽見頭上角出徧體鱗生皇妣大
駭墜高祖于地尼自外入見曰已驚我兒致令晚得天

隋紀

周世宗自伐遼還在道閱四方文書得韋囊中有木
三尺餘題曰點檢作天子時張永德爲點檢永德周懿

親有功周王疑之遂以匡胤代永德匡胤以趙普爲掌

書記

綱鑑

梁祖宋州碭山縣于溝里人本名溫賜名全忠建國後改名晃家世爲儒祖信父誠皆以教授爲業誠卒蚤有三子俱幼母王氏携養寄于同縣人劉崇家昆弟之中唯溫狡猾無行崇母撫養之崇弟兄嘗加譴杖一日偷崇家釜而竄爲崇追回崇母遮護以免朴責善遂走鹿徃徃及而獲之又崇母常見其有龍蛇之異他日與仲兄存入黃巢中作賊伯兄昱與王母氏尚依劉家溫旣辭去不知存亾及溫領鎮于汴盛飾輿馬遣人迎母于

崇家王氏皇恐辭避深藏不之信謂人曰朱三落拓無行何處作賊送死焉能自致富貴汴帥非吾子也使者具陳離鄉去里之由歸國立功之事王氏方泣而信是日與崇母並迎歸汴溫盛禮郊迎人士改觀崇以舊恩位至列卿爲商州刺史王氏以溫貴封晉國大夫人仲兄存于賊中爲矢石所中而卒溫致酒于母歡甚語及家事謂母曰朱氏辛苦業儒不登一命今有子爲節度使無忝先人矣母不憚良久謂溫曰汝致身及此信謂英特行義未必如先人朱二與汝同入賊軍身死蠻徼孤男稚女艱食無告汝未有恤孤之心英特卽有諸無

取也温垂涕謝罪即令召諸兄子皆至汴友倫皆立軍
功位至方鎮

北夢瑣言

宋秀州外醫張浩云少為清德閹官一日過嘉興忽觀
丞廳赤光照天疑為回祿亟入視之乃趙縣丞室中適
免娠是誕育孝宗也

揮塵錄

靖康之變金人盡欲得京城宗室或謂宗正寺玉牒可
據虜酋立命取籍會虜以事暫還戶部邵澤民溥時為
交務官索視之每二三板則掣一板投火中嘆曰力不
能遍存也俄虜使至遂按籍以取之凡宗室獲免者澤
民力也而人多不知

開燕常談

有舉孝廉而為人主者魏武吳大帝也狀元及第而
人主者夏主李遵項也

弁州別集

我國家之待宗室稱有三善焉謂自親王至中尉歷八
世而祿始絕以明有富也謂親王郡王即公侯大臣不
敢抗以明有貴也謂王國不得官吏民于有司以明有
節也制誠善矣顧宗支日繁不無賢不肖異稟而民田
不加廣歲徵不足以給祿加賦則重敝民削之則斂宗
怨倘坐視其不給而不為之所有羣聚要求甘犯法而
不顧者有併室而雉經者有易名姓而為所不可為者
親親之誼安在耶於是乎有議設宗學以興其禮義之

心者有議聽應舉以開其登庸之路者有議有司嚴徵
科以足王國之賦者有議有司引繩墨以治庶人之罪
者有議弛出城之禁俾得就農末之業者有議寬擅婚
之禁俾得免怨曠之嗟者有議報孕以防花生之弊者
有議另城以防羣聚之橫者有議勸親王置義田以贍
本支之貧者有議籍郡王廢絕田以周同姓之困者有
議請名封隸之右轄免爲奸吏所局騙者有議歲表文
附之藩司免其賫捧之費者有議請以河東鹽課銀濟
山西靈丘懷仁二府之不足者有議請以陝西撫按贖
罰銀以濟秦韓二府之不足者有議請以河南各項存

留雜派以濟周府之不足者要皆濟急之方善後之計
乎第盈庭之言孰爲之主道旁之築安觀其成失今不
決竊恐生齒之繁日不同而月異其勢愈重議亦且愈
難矣書曰惟克果斷乃罔後艱能無望於當事者財擇
而奮然行之以紓天下燃眉之急以固本支百世之傳
也哉

滴露漫錄

姓名襍

苗裔苗草木之莖葉根所生也裔裾之末衣之餘也○
二女娥皇女英也妃以盲姪以瑩以觀其內九男事之
以觀其外

路史

陳厥記畧其有人以去爲姓得衣乃成厥名有米覆之
以唐禹來東征歿葬其疆不直自斥託類自明寫精露
愚畧以事類俟告後人文屬亂定自于邦賢邦賢以口
爲姓承之以天楚相屈原與之同名明於古今德配顏
淵時莫能與伏竄自容年加申酉懷道而終友臣不施
猶夫子得麟覽覩厥意嗟嘆其文於乎哀哉温故知新
述暢子胥以喻來今云云明楊慎據此得袁康吳平名
姓可謂異代賞音蓋袁康者先述此書于東漢初而吳
平者復爲之屬文定辭于東漢之季故云百歲一賢猶
爲比肩也其二云禹來東征歿葬其疆未又云覆之以庚

兵絕之也豈袁非越人更始間爲亂兵戕于越地因
葬與吳平則自是越人成此書者故云文屬辭定自于
邦賢也此書閱世數千年至用脩始發作者姓名越絕

馬援其先趙奢爲趙將能馭馬號馬服君子孫因以爲

氏○楊氏自季至雄五世而傳一子故雄無宅楊於蜀

楊雄傳

京房字君明好鐘律知音聲房本姓李推律自定爲京

氏漢書

大雨謠曰雨若不止洪水必起因名曰洪後以

識文有章付應王又以孫堅背有章付字遂改姓符氏
魏孝文雅重門族詔司徒左長史宋弁定諸州士族多

所升降衆議以薛氏爲河東茂族帝曰薛氏蜀也豈可入郡姓直閣執戟在殿下出次對曰臣之先人漢末仕蜀二世復歸河東今六世相襲非蜀人也陛下黃帝之胤受封北土豈可亦謂之胡耶今不豫郡姓何以生爲乃碎戟于地帝徐曰然則朕甲卿乙乎乃入郡姓仍曰卿非宗起乃起宗也

譜謀

章俊卿曰丙本李陵之後自匈奴歸魏見于丙殿賜姓丙武氏出自周平王之少子生而有文在手曰武遂以爲氏宇文出自神農之後以其有嘗草之功自號爲候汾氏其後訛爲宇文氏竇氏本姒姓也有仍逃出自竇

故少康氏爲竇王氏出自姬姓周靈王太子晉之後時人號曰王家故曰王氏太原瑯琅其后也又有出自畢公高之后者魏信陵公之子孫時人以其故王族號曰王家亦爲王氏裴出風姓非子之曾孫封非邑鄉故爲非邑氏后世去邑從衣此一裴也晉平公封顓帝之孫于裴中號裴君又一裴也

代辭編

李光弼裨將安抱玉屢有戰功自陳耻與安祿同姓賜姓李氏

綱目

宋詹士龍字雲卿固始人都統鈞之子元兵破鄂鈞歿士龍甫三歲董忠獻公獲之以見世祖嘆曰此忠臣子

也汝善養之既長知非董晝夜痛哭他日從獵滹沱懇
求復姓忠獻戲曰原欲復爾姓乎試爲投石水中浮則
爾從士龍祝天曰吾父有靈石當暫浮因以石投中沉
而復浮者數四忠獻愕曰天也遂許之

文獻通考

元豐五年黃冕仲榜唱名有暨陶者主司初以洎音呼
之二呼不應蘓子容時爲試官神宗顧蘇蘇曰當以入
聲呼之果出應上曰卿何以知爲入音蘇言三國志吳
有暨艷陶恐其后遂問陶鄉貫曰崇安人上喜曰果吳
人也時暨字闕下一畫蘓復言字下當從旦此唐避代

宗諱流俗遂誤弗改耳

代醉編

童禮稽山人始爲諸生後棄之走燕仍得入試者甫閱
其卷有巨蟬鼓甲而前主試者異之遂寘第一衆論以
童冒藉首薦攻之事急聞世廟問璫者曰何謂冒藉璫
者對曰各省士子以順天籍獲雋者名之爲冒世廟曰
普天下都是我的秀才何得言冒也是年試題舜有臣
五人而天下治世廟因閱童卷詰主試者曰此卷何以
宜冠多士對曰各卷但言五人之賢惟此卷先發大聖
如舜原足治天下而又得五臣所以天下益歸于治深
得尊君之意允宜首薦世廟大喜冒禁遂寢

耳談

國之任大臣必避其姓名有妨于國家者忌于王家者

如秦之忌胡后周之忌漆忌黑唐之忌武晉以馬姓而
忌牛其姓有迤蹇不利之字或有佳美之姓三五人奏
成凶惡之意者不可茲用如宋之用蕭道成而弔所篡
者道成者與盜成同也唐中宗為韋后所鳩而弑韋者
危也遭其危險也憲宗為宦官陳弘志所弑陳者臣也
弘志者言其志大也使臣下之志大人主其何為乎餘
皆倣此始于秦然晉牛興而馬亾故馬忌牛猪忌羊無
角而忌有角音豕相似者忌之其說始于南唐原始秘書
蜀人多奇姓今百家姓以為出於宋朝故首以趙錢孫
李尊國姓也我朝千家姓亦以朱奉天運起文然未見

有天姓者而蜀姓或有出於二家外自魏晉以來取才
於門閥故姓氏尤重唐重八姓論相於此至不許與他
姓為婚姻自八姓而下凡有三百五十姓宋嘉祐中亦
有千姓編雁門邵思撰姓解則分為一百七十門至有
二千五百六十八氏漢潁川太守聊氏復有萬姓譜古
姓之存于今者鮮矣蜀都雜抄

世系部三
皇統
盤古氏 伏羲 神農
黃帝 堯 舜
禹 湯 文
武 東西周 秦始
漢高西

第十二卷

世系部三

皇統

盤古氏

伏羲

神農

黃帝

堯

舜

禹

湯

文

武

東西周

秦始

漢高西

卷十二目錄終

二十二氏曰鉅靈氏句疆氏譙明氏涿光氏鈎陳氏黃
神氏狃神氏犁靈氏大騄氏鬼騄計音氏弇茲氏秦逢氏
冉相氏蓋盈氏大敦氏雲陽氏巫常氏秦豆氏空桑氏
神民氏猗帝氏次民氏因提紀十三氏曰辰放氏治二
百五
載十蜀山氏六魍音傀氏六渾沌氏七東戶氏十七皇覃
氏七啓統氏三吉夷氏四几遽氏一豨韋氏四有巢氏
治三百遂人氏治二百三庸成氏八禪通紀十九氏曰
栢皇氏二十中皇氏四大庭氏五栗陸氏五昆連氏十
世軒轅氏三赫胥氏一葛天氏四尊盧氏五祝融氏三
吳英氏九有巢氏七朱襄氏三陰康氏二無懷氏六

伏羲

伏羲帝母華胥生帝於成紀以木德繼天而王故風姓
號大昊帝德合上下天應以鳥獸文章地應以河圖洛
書由是始畫八卦造書契以代結繩之政制嫁娶以別
男女之禮制六書作甲曆斲桐為琴繩絲為絃絃二十
有七命之曰離微以通神明之貺以合天人之和緼桑
為三十六絃之瑟以脩身理性反其天真而樂音始興
結網罟以教佃漁都于陳今河南是以能馴伏鳥獸而
為犧牲故稱伏羲又始為庖廚制飲食又稱庖羲氏後
有女媧氏栢皇氏卷須氏栗陸氏驪連氏赫胥氏尊盧

氏混沌氏吳英氏有巢氏朱襄氏葛天氏陰康氏無懷氏凡十五氏皆襲庖羲之號合六萬一千六百四十年外紀云伏羲在位一百一十年

神農

神農帝母曰女登遊於華陽有神龍首感女登於尚羊生帝於姜水故姜姓代共工氏而有天下斲木爲耜揉木爲耒日中爲市嘗百草之酸鹹察水泉之甘苦令民知所避就都于曲阜今山東兗州是也以其始興農事故稱神農以火承木位在南方主夏故又曰炎帝後有帝承帝臨魁帝明帝宜帝夾行夏至帝榆罔時神農氏

衰諸侯咸歸軒轅七代共五百二十年帝農在位一百四十年

黃帝

黃帝姓公孫名軒轅有熊國君少典之子姬姓也母曰附寶見大電光繞北斗樞星照野感附寶娠二十四月而生帝於壽丘長於姬水有聖德時炎帝衰諸侯欲侵軒轅修德習用干戈以征不享諸侯來賓及炎帝欲侵凌諸侯諸侯咸歸軒轅乃修德振兵撫萬民度四方以與炎帝戰於阪泉之野三戰然後得志蚩尤作亂軒轅徵師諸侯與蚩尤戰於涿鹿之野擒殺之諸侯咸尊軒

轅爲天子帝由是代帝榆罔而有天下立六相見日月
星辰之象制星官之書命蒼頡制字命大撓作甲子命
容成作蓋天爲觀天之器命隸首作算數命伶倫造律
呂命大容作咸池之樂作冕旒制上玄下黃十二章之
衣裳作器用造舟車作合宮以祀上帝作貨幣制兵器
作杵臼爲宮室作內經命元妃西陵氏教民蠶畫野分
九州建都于涿鹿今北京順天府涿洲也以上德王故
稱黃帝在位一百二十四年其臣左徹感恩取衣冠几
杖而廟祀之帥諸侯羣臣歲時朝祭焉

唐堯

唐堯陶唐氏帝嚳之子伊祈姓也母出陳鄆氏名慶都
居伊祈之墟孕十四月而生堯於丹陵名曰放勳鳥庭
荷勝眉有八彩豐下銳上或從母姓伊祈氏年十五而
佐帝摯受封於唐二十而登帝位故國號曰唐帝茅茨
不剪土階三級書曰若稽古帝堯曰放勳欽明文思安
安允恭克讓光被四表格于上下克明峻德以親九族
九族既睦平章百姓昭明姓協和萬邦黎民於變時雍命
羲和曆象日月星辰作曆允釐百工庶績咸熙以火德
王天下都于冀今平陽府是也帝卽位時有九年之水
使鯀治之弗績又有景星曜於天甘露降於地朱草生

于郊鳳凰止於庭蓂莢生於階作樂曰大章居位七十
二年得舜攝政又二十八年起甲辰盡癸未共一百年

虞舜

帝舜有虞氏姚姓黃帝之後黃帝有子二十五人帝其
支庶也其先出自顓頊顓頊生窮蟬窮蟬有子曰敬康
敬康生勾芒勾芒有子曰喬牛喬牛生瞽瞍瞽瞍妻曰
握登見大虹之祥感而生舜於姚虛故姓姚氏字都君
目有兩瞳具大聖之德家本冀州其生母早卒瞽瞍再
娶生象乃惑於後妻并少子嘗欲殺舜奪嫡立象舜竭
力事親不得於親而號泣於旻天孝友之至通於神明

嘗耕於歷山耕者讓畔陶於河濱器不苦窳漁於雷澤
漁者讓淵作什器於壽丘販鬻於頓丘遷於負夏以事
其親而瞽瞍底豫年三十始以孝聞於堯七十載堯因
四岳之薦乃以娥皇女英二女妻之而邑於虞書曰若
稽古帝舜曰重華協帝濬哲文明溫恭允塞玄德升聞
乃命以位慎徽五典五典克從納于百揆百揆時敘賓
于四門四門穆穆納于大麓烈風雷雨弗迷七十三載
堯乃命舜代已攝政受終于文祖作璿璣玉衡以齊七
政七十四載巡狩四嶽七十六載象典刑誅四凶命禹
治水八十一載禹治水告成功肇十有二州封禹于夏

四嶽於呂伯益於秦稷于邰契于商及堯崩舜受堯禪
位都于蒲坂今山西蒲州是也以土德王天下號有虞
氏色尚黃咨四嶽十二牧命九官作樂簫韶九成鳳凰
來儀彈五絃琴歌南風詩天下自治形威德於兩階之
舞而民自化與臯陶曰股肱起哉元首喜哉百工熙哉
在位三十三年薦禹于天使代已位又一十八年起甲
申盡癸酉共五十年

夏禹

大禹夏后氏顓頊之後伯鯨之子姁姓也其先堯封鯨
爲崇伯納有莘氏女曰志是爲修己見流星貫昴又吞
神珠意感而生禹於石紐名文命字高密長於西羌西
夷人也初堯使鯨治水無功舜殛死之遂命禹繼鯨治
水禹乃敷土隨山刊木奠高山大川決九州之川以距
海濬猷澮之水以距川然後九州攸同四隩旣宅九山
刊旅九澤旣陂四海會同初娶塗山氏之女生啓纔四
日即往治水凡八年于外三過家門而不入十三年而
洪水平堯美其績乃賜姓姁氏封爲夏伯故謂之伯禹
及舜老始使禹代攝行天子事五年命以位曰涿水儆
予成允成功惟汝賢克勤于邦克儉于家不自滿假惟
汝賢汝惟不矜天下莫與汝爭功汝惟不伐天下莫與

汝爭能予懋乃德嘉乃丕績天之曆數在爾躬汝終陟
元后人心惟危道心惟微惟精惟一允執厥中舜崩禹
除舜喪受禪而有天下以金德王天下都安邑今山西
平陽府安邑縣是也國號夏以建寅爲正朔色尚黑別
五服敘九疇復并九州作大夏之樂自甲戌至甲申在
位十年

商湯

湯先時有娥氏女配高辛世傳謂玄鳥墮卵娥氏吞之
而生契及爲堯司徒教民有功封於商賜子姓契十二
世出主癸主癸之妃曰扶都覓白氣貫月意感以乙日

生湯故名履字天乙帝豐下銳上哲而有髯聲揚身具
九尺臂四肘有聖德諸侯不義者湯從而征之將伐桀
先滅韋顧昆吾遂戰於鳴條之野桀奔於南巢之山湯
乃卽天子之位以水德王天下因契封商故國號商其
正建丑色尚白法三聖式九圍出野祝網以身禱旱因
伐夏惟有慙德曰予恐來世以台爲口實仲虺作誥曰
惟天生民有欲無主乃亂惟天生聰明時又有夏昏德
民墜塗炭天乃錫王勇智表正萬邦纘禹舊服茲率厥
典奉若天命惟王不邇聲色不殖貨利德懋懋官功懋
懋賞用人惟已改過不吝克寬克仁彰信兆民湯誥曰

惟皇上帝降衷于下民若有恒性克綏厥猷惟后微子
之命曰乃祖成湯克齊聖廣淵皇天眷佑誕受厥命撫
民以寬除其邪害功加于時德垂後裔詩曰帝命不違
至于湯齊湯降不遲聖敬日躋昭格遲遲上帝是祇帝
命式于九圍作大濩之樂都于亳今河南歸德是在位
十有三年

周文王

西周文王帝嚳之妃姜源生子稷舜舉爲農官播五穀
有功於民賜姓姬氏封於邠稷生不窟不窟生鞠鞠生
公劉公劉生慶節慶節生皇僕皇僕生差弗差弗生毀

隄毀隄生公非公非生高圉高圉生亞圉亞圉生公叔
祖類祖類生古公亶父亶父生季歷季歷生文王於岐
周故後國號曰周今陝西岐山縣是文王生有聖德施
仁以治岐布惠以造周嘗被崇虎侯之譖紂忌之囚姜
里七年作易彖辭閔天之徒以美女白狐大貝請釋之
紂因錫之鐵鉞爲西方諸侯之長得專征伐一日出獵
而卜之曰非熊非羆非虎非貔所獲者霸王之輔遂遇
呂尚於渭水之陽載後車歸號曰尚父是時文王三分
天下有其二猶率叛國以事紂武王曰維我文考若日
月之照臨光於四方顯於西土作酒誥教小子有正有

事無彝酒越庶國飲惟祀德將無醉惟曰我民廸小子
惟土物愛厥心臧聰聽祖考之彝訓越小大德小子惟
一周公曰文王卑服卽康工田功徽柔懿恭懷保小民
惠鮮鰥寡自朝至於日中旻不遑暇食用咸和萬民不
敢盤於遊田以萬邦惟正之供詩曰穆穆文王於緝熙
敬止又曰維此文王小心翼翼昭事上帝聿懷多福厥
德不回以受方國又曰虞芮質厥成文王蹶厥生子曰
有疏附予曰有先後予曰有奔走予曰有禦侮又曰刑
于寡妻至于兄弟以御于家邦雝雝在宮肅肅在廟不
顯亦臨無射亦保不聞亦式不諫亦入肆成人有德小

子有造又曰帝謂文王子懷明德不大聲以色不長言
以革不識不知順帝之則享國五十年傳子發

武王

武王文王之子名發因紂無道觀兵至孟津諸侯不期
而會者八百皆曰紂可伐矣武王不許猶且遵養時晦
及紂殺王子比干囚箕子紂兄微子乃抱其樂器奔周
於是乃徧告諸侯陳師牧野紂乃登鹿臺衣寶玉自焚
死武王遂代商而爲天子以木德王自豐徙都于鎬其
正建子色尚青方伐殷時誓于師曰惟天地萬物父母
惟人萬物之靈亶聰明作元后元后作民父母又曰天

佑下民作之君作之師惟其克相上帝寵綏四方有罪
無罪予曷敢有越厥志又曰紂有億兆夷人離心離德
予有亂臣十人同心同德雖有周親不如仁人天視自
我民視天聽自我民聽百姓有過在予一人今朕必往
一戎衣天下大定乃作洪範反商政釋箕子囚封比干墓
式商容閭散鹿臺之財發鉅橋之粟大賚於四海而萬
姓悅服偃武脩文歸馬於華山之陽放牛於桃林之野
列爵惟五分土惟三建官惟賢位事惟能重民五教惟
食喪祭惇信明義崇德報功垂拱而天下治訪於箕子
曰惟天陰騭下民相協厥居我不知其彝倫攸敘箕子

洪範一五行曰水火木金土二五事曰貌言視聽
思三八政一食二貨三祭祀四司空五司徒六司寇七
賓八師四五紀一歲二月三日四星辰五曆數中五為
皇極曰皇建其有極欽時五福用敷錫厥庶民惟時厥
庶民罔極錫汝保極六三德一正直二剛克三柔克七
稽疑十五曰雨霽蒙繹克占二曰貞曰晦八庶徵曰雨
暘寒燠風九五福曰壽富康寧攸好德考終命六極曰
凶短折疾憂貧惡弱問大公以黃帝顓頊之道對曰在
丹書敬勝怠者吉怠勝敬者滅義勝欲者從欲勝義者
凶凡事不勤則枉弗敬則不正枉者滅廢敬者萬世又

曰以仁得之以仁守之其量百世以不仁得之以仁守
之其量十世以不仁得之以不仁守之必及其世王得
之書於席之四端曰安樂必敬無行可悔一反一側亦
不可忘所鑒不遠視爾所代作大武之樂自己卯起在
位七年

東周西周

周烈王立十年崩弟顯王立顯王立四十八年崩子慎
靚王立慎靚王立六年子赧王立先是敬王四年子朝
奔楚王雖反國然以子朝餘黨多在王城乃徙都成周
而王城之都廢至考王封其弟揭于王城爲周桓公自

此以後東有王西有公而東西之名猶未立也及桓公
生威公威公生惠公惠公之少子班又別封於鞏是爲
東周以鞏與成周俱在王城之東也班之兄仍襲父爵
居于王城是爲西周武公以王城在成周之西也故自
此以後西有公東亦有公二公雖各有所食而周尚爲
一至顯王二年趙韓分周地爲二二周公治之王直寄
焉而已周之分東西自此始矣九年東周惠公卒子傑
嗣慎靚王以上皆在東赧王立始遷于西周卽王城舊
都也後秦昭王使攻西周西周君奔秦頓首受罪盡獻
其邑三十六秦受其獻而遷西周君于愚狐後七歲而

秦莊襄王滅東西周東西周皆入秦周遂不祀

秦始皇

秦始皇帝者莊襄王子也名為政當是時秦地已并巴蜀漢中越宛有郢置南郡矣北收上郡以東有河東太原上黨郡東至滎陽滅二周置三川郡九年王冠帶劔李斯因說秦王請先取韓以恐他國於是使斯下韓大梁人尉繚來說秦王曰以秦之彊諸侯譬如郡縣之君臣但恐諸侯合從翕而出不意此乃智伯夫差潛王之所以亡也願大王毋愛財物賂其豪臣以亂其謀不過亡三十萬金則諸侯可盡秦王從其計見尉繚亢禮衣

服飲食與繚同繚曰秦王為人蜂準長目鷲鳥膺豺聲少恩而虎狼心居約易出人下得志亦輕食人我布衣然見我常身自下我誠使秦王得志于天下天下皆為虜矣不可與久游乃亡去秦王覺固止以為秦國尉卒用其計策而李斯用事至二十六年秦遂并天下丞相御史等上尊號制曰朕聞上古有號毋謚中古有號死而以行為謚如此則子議父臣議君也朕弗取焉朕為始皇帝後世以計數二世三世至于萬世傳之無窮周得火德秦代周從所不勝方今水德之始改年始朝賀皆自十月朔衣服旄旌節旗皆上黑數以六為紀符法

冠皆六寸而輿六尺六寸爲步乘六馬更名河曰德水
丞相王綰等言諸侯初破燕齊荆地遠不爲置王無以
鎮之請立諸子始皇曰是樹兵也而求其寧息豈不難
哉從廷尉李斯議分天下以爲三十六郡郡置守尉監
更名民曰黔首收天下兵聚之咸陽銷以爲鍾鐻金人
十二重各千石置宮庭中每破諸侯寫放其宮室自雍
門以東至涇渭殿屋複道周閣相屬所得諸侯美人鐘
鼓以充入之二十七年始皇游隴西北地出雞頭山過
回中作信宮渭南已更命信宮爲極廟象天極自極廟
道通驪山作甘泉前殿築甬道自咸陽屬之二十八年

始皇東行郡縣上鄒嶧山立石頌秦功德乃遂上泰山
立石封祠祀下風雨暴至休樹下因封其樹爲五大夫
禪梁父刻所立石於是乃並渤海以東過黃腫窮成山
登之梁立石頌秦德焉而去南登瑯琊畱三月作瑯琊
臺立石刻齊人徐市言海中有三神山名曰蓬萊方丈
瀛州請得齋戒與童男童女求之于是發童男童女數
千人入海求仙人始皇還過彭城齋戒禱祠欲出周鼎
泗水使千人沒水求之弗得乃西南渡淮水之衡山南
郡浮江至湘山祠逢大風幾不得渡上問博士曰湘君
何神也博士對曰聞之堯女舜之妻而葬于此於是始

皇大怒使刑徒三千人皆伐湘山樹赭其山二十九年
始皇東遊至陽武博浪沙爲盜所驚乃登之罘刻石旋
遂之瑯琊道上黨入三十一年更名臘曰嘉平始皇爲
微行咸陽與武士四人俱夜出逢盜蘭池見窘武士擊
殺盜三十二年始皇之碣石使燕人盧生求羨門高誓
刻碣石門壞城郭決通隄防因使韓終侯公石生求仙
人不死之藥盧生使入海還以鬼神事奏錄圖書曰亡
秦者胡也始皇乃使將軍蒙恬發兵三十萬人北擊胡
略取河南地三十四年始皇置酒咸陽宮僕射周清臣
頌秦威德始皇說博士淳于越進曰臣聞殷周之王千

餘歲封子弟功臣自爲枝輔今陛下有海內而子弟爲
匹夫卒有田常六卿之臣無輔拂何以相救哉始皇下
其議丞相李斯曰五帝不相復三代不相襲各以治非
其相反時變異也今陛下創大業建萬世之功越言乃
三代之事何足法也異時諸侯並爭厚招游學今天下
已定法令出一百姓當家則力農工士則學習法令辟
禁今諸生不師今而學古以非當世惑亂黔首聞令下
則各以其學議之入則心非出則巷議夸主以爲名異
趣以爲高率羣下以造謗如此弗禁則主勢降乎上黨
與成乎下禁之便臣請史官非秦記皆燒之非博士官

所職天下敢有藏詩書百家語者悉詣守尉雜燒之有
敢偶語詩書者棄市以古非今者族吏見知不舉者與
同罪令下三十日不燒黥爲城旦所不去者醫藥十筮
種樹之書若欲有學法令以吏爲師制曰可三十五年
始皇以咸陽人多先王之宮廷小乃營作朝宮渭南上
林苑中先作前殿阿房東西五百步南北五十丈上可
以坐萬人下可建五丈旗周馳爲閣道自殿下直抵南
山表南山之顛以爲闕爲複道自阿房渡渭屬之咸陽
以象天極閣道絕漢抵營室也阿房宮未成成欲更擇
令名名之作宮阿房故天下謂之阿房宮於是立石東

海上胸界中以爲秦東門盧生說始皇曰臣等求芝奇
藥仙者常弗遇願上所居宮毋令人知然後不死之藥
殆可得也於是始皇乃令咸陽之旁二百里內宮觀二
百七十複道甬道相連幃帳鐘鼓美人充之各案署不
移徙行所幸有言其處者罪死始皇幸梁山宮從山上
見丞相車騎衆弗善也中人或告丞相丞相後損車騎
始皇怒曰此中人泄吾語捕諸時在旁者皆殺之自是
後莫知行之所在侯生盧生相與謀曰始皇爲人天性
剛戾自用起諸侯并天下意得欲從以爲自古莫及已
專任獄吏獄吏得親幸丞相諸大臣皆受成事倚辦于

上上至以衡石量書日夜有程不中程不得休息貪於
權勢至如此未可爲求仙藥於是乃亡去始皇聞亡乃
大怒使御史悉案問諸生傳相告引乃自除犯禁者四
百六十餘人皆坑之始皇長子扶蘇諫曰天下初定遠
方黔首未集諸生皆誦法孔子今上皆重法繩之臣恐
天下不安始皇怒使扶蘇北監蒙恬兵於上郡三十六
年秋使者從關東夜過華陰平舒道有人持璧遮使者
曰爲吾遺瀉池君因言曰今年祖龍死使者問其故因
忽不見使者奉璧具以聞始皇默然良久曰山鬼固不
過知一歲事也退言曰祖龍者人之先也使御府視璧

乃二十八年行渡江所沈璧也於是始皇卜之卦得游
徙吉三十七年始皇帝出游左丞相李斯從右丞相去
疾守少子胡亥愛慕請從上許之十一月行至雲夢望
祀虞舜於九疑浮江下觀籍柯渡海渚過丹陽至錢塘
臨浙江水波惡乃西北二十里從峽中渡上會稽祭大
禹望於南海還過吳從江乘渡並海上北至瑯琊方士
徐市等入海求神藥數歲不得乃詐曰蓬萊藥可得然
常爲大鯨魚所苦願請善射與俱始皇乃令入海者齋
捕巨魚具而自以連弩候大魚出射之至之杲見巨魚
射殺一魚遂並海西至平原津而病崩於沙丘車府令

趙高丞相李斯矯詔立胡亥賜長子扶蘇死胡亥立是
爲二世已而趙高譖殺李斯又弑二世立子嬰降號爲
王子嬰殺趙高漢兵入關子嬰降而秦亡

漢高祖

漢高祖劉邦字季沛豐邑人也母媪嘗息大澤之陂夢
與神遇是時雷電晦冥父太公往視則見交龍於上已
而有娠遂產高祖高祖爲人隆準而龍顏美鬚髯左股
有七十二黑子寬仁愛人意豁如也常有大度不事家
人生產作業及壯試吏爲泗上亭長廷中吏無所不狎
侮好酒及色嘗繇咸陽縱觀秦皇帝喟然太息曰嗟乎

大丈夫當如此矣單父人呂公善沛令沛中豪傑吏聞
令有重客皆往賀蕭何爲主吏主費令諸大夫曰進不
滿千錢坐之堂下高祖爲亭長素易諸吏乃給爲謁曰
賀錢萬貫不持一錢謁入呂公大驚起迎之門呂公者
好相人見高祖狀貌因重敬之引入坐上坐蕭何曰劉
季固多大言少成事高祖因狎侮諸客遂坐上坐無所
訕呂公因目固留高祖竟酒後呂公曰臣少好相人相
人多矣無如季相願季自愛臣有息女願爲箕帚妾卽
呂后也高祖嘗告歸之田呂后與兩子居田中有一老
父過相后曰夫人天下貴人也令相兩子見孝惠帝曰

夫人所以貴者乃此男也相魯元公主亦皆貴老父已去高祖適從旁舍來吕后具言客有過相我子母皆大貴高祖乃追及問老父老父曰鄉者夫人兒子皆以君君相貴不可言高祖乃謝曰誠如父言不敢忘德高祖以亭長爲縣送徒驪山徒多道亡乃解縱所送徒曰公等皆去吾亦從此逝矣徒中壯士願從者十餘人高祖被酒夜徑澤中令一人行前行前者還報曰前有大蛇當徑高祖醉曰壯士行何畏乃前拔劍斬蛇蛇分爲兩徑開行數里醉因卧後人來至蛇所有一老嫗夜哭人問嫗何哭嫗曰吾子白帝子也化爲蛇當道今者赤帝

子斬之人乃以嫗爲不誠欲笞之嫗因忽不見後人至告高祖高祖乃心獨喜自負諸從者日益畏之秦始皇帝嘗曰東南有天子氣于是東遊以厭當之高祖卽隱于芒碭山澤間吕后與人俱求常得之高祖怪問之吕后曰季所居上常有雲氣故從往常得季高祖又喜沛中子弟或聞之多欲附者矣秦二世元年陳涉起斬至陳自立爲楚王郡縣多殺長吏以應涉沛令欲以沛應之今後悔恐其有變乃閉城城守欲誅蕭曹蕭曹恐踰城保高祖高祖乃書帛射城上與沛父老曰天下同苦秦久矣今父老雖爲沛令守諸侯並起今屠沛沛令共

誅令擇可立立之以應諸侯卽室家完不然父子俱屠
無爲也父老乃帥子弟共殺沛令開城門迎高祖立爲
沛公祠黃帝祭蚩尤于沛庭而釁鼓旗幟皆赤從赤帝
子讖故也秦二世二年項梁擊殺景駒秦嘉正薛沛公
往見之六月沛公與項梁共立孫心爲楚懷王懷王與
諸將約先入定關中者王之當是時秦二世三年也秦
兵彊常乘勝逐北諸將莫利先入關獨羽怨秦破項梁
奮勢願與沛公西入關懷王諸先將皆曰項羽爲人僇
悍禍賊嘗攻襄城襄城無噍類所過無不殘滅不如更
遣長者扶義而西告諭秦父兄秦父兄苦其主久矣今

誠得長者往毋侵暴宜可下項羽不可遣獨沛公素寬
大長者卒不許羽而遣沛公沛公與南陽守齧戰犍東
大破之略南陽郡南陽守走保城守宛沛公又夜引軍
從他道還偃旗幟遲明圍宛城三匝齧降沛公攻武關
入秦漢元年至霸上秦王子嬰素車白馬係頸以組封
皇帝璽符節降軹道旁諸將或言誅秦王沛公曰始懷
王遣我固以能寬容且人已服降殺之不祥乃以屬吏
遂西入咸陽召諸縣豪傑曰父老苦秦苛法久矣誹謗
者族僞語者棄市吾與諸侯約先入關者王之吾當王
關中與父老約法三章耳殺人者死傷人及盜抵罪餘

悉除去秦法吏民皆安堵如故唯恐沛公不爲秦王項羽帥諸侯兵欲西入關關門閉聞沛公已定關中羽大怒使黥布等攻破函谷關遂至戲下沛公左司馬曹無傷使人言羽曰沛公欲王關中令子嬰相珍寶盡有之欲以求封亞父范增說羽曰沛公居山東時貪財好色今聞其入關珍物無所取婦女無所幸此其志不小吾使人望其氣皆爲龍成五色此天子氣急擊之勿失于是饗士旦日合戰會羽季父項伯素善張良夜馳見張良具告其實欲與俱去沛公乃因良見伯謝羽鴻門羽乃解羽自立爲西楚霸王梁楚地九郡都彭城背約

更立沛公爲漢王王巴蜀漢中四十一縣都南鄭漢王既至南鄭諸將及士卒皆歌謳思東歸多道亡還者因聽韓信策還定三秦二年冬項羽使九江王布殺義帝于郴漢王自臨晉渡河至洛陽新城三老董公遮說漢王漢王深善之於是爲義帝發喪袒而大哭哀臨三日發使告諸侯當是時齊王田榮既亡榮弟橫收得數萬人復立榮子廣爲齊王羽雖聞漢東既擊齊欲破之而後擊漢漢王以故得劫五諸侯兵東伐楚到外黃彭越將三萬人歸漢漢王拜越爲魏相國令定梁地漢王遂入彭城收羽美人貨賂置酒高會羽聞之令其將擊齊

而自以精兵三萬人晨擊漢軍大戰彭城靈壁東睢水
上大破漢軍多殺士卒睢水爲之不流圍漢王三匝會
大風從西北起折木發屋揚沙石晝晦楚軍大亂漢王
乃得與數十騎遁去過沛使人求室家不得道逢孝惠
魯元載與俱行審食其從太公呂后反遇楚軍楚常置
軍中以爲質漢王謂謁者隨何曰公能說九江王布使
舉兵畔楚項王必畱擊之得畱數月吾取天下必矣五
月漢兵復大振與楚戰滎陽南京索間破之築甬道屬
河以取敖倉八月漢王以韓信爲左丞相與曹參灌嬰
俱擊魏九月信等虜豹傳詣滎陽定魏地置河東太原

上黨郡三年冬十月韓信張耳東下井陘擊趙斬陳餘
獲趙王歇置常山代郡隨何旣說黥布起兵攻楚楚使
項聲龍且攻布布戰不勝十二月布與隨何間行歸漢
漢王分之兵與俱至成臯項羽數侵奪漢甬道軍乏食
漢王乃從陳平計與平黃金四萬斤以間疏楚君臣羽
果疑亞父亞父大怒而去發病死將軍紀信曰事急矣
臣請誑楚于是陳平夜出女子二千餘人楚因四面擊
之紀信乃乘王車黃屋左纛曰食盡漢王降楚楚皆呼
萬歲之城東觀以故漢王得與數十騎出西門遁羽燒
殺信漢王出滎陽至成臯入關收兵欲復東轅生說曰

漢與楚相距滎陽數歲漢常困願君王出武關項王必
引兵南走王深壁令滎陽成皐間且得休息使韓信等
得輯河北趙地連燕齊君王乃復走滎陽如此則楚所
備者多力分漢得休息復與之戰破之必矣漢王從其
計出軍宛葉間與黥布行收兵羽聞漢王在宛果引兵
南漢王堅壁不與戰是月彭越渡睢與項聲薛公戰下
邳破殺薛公羽使終公守成皐而自東擊彭越漢王引
兵北擊破終公復軍成皐六月羽已破走彭越聞漢軍
成皐乃引兵西拔滎陽遂圍成皐八月臨河南饗軍小
修武欲復戰郎中鄭忠說止漢王高壘深塹勿戰漢王

聽其計使盧縮劉賈將卒二萬人騎數百渡白馬津入
楚地佐彭越燒楚積聚復擊破楚軍羽乃謂海春侯曹
咎曰謹守成皐卽漢王欲挑戰慎勿與戰羽遂引兵東
擊彭越四年冬漢果數挑成皐戰又使人辱之曹咎怒
渡兵汜水漢擊之大破楚軍盡得楚國金玉貨賂漢王
遂引兵渡河復取成皐軍廣武就敖倉食羽旣下梁地
十餘城聞成皐破乃引兵還軍廣武與漢相守數月楚
軍食少項王患之乃爲高俎置太公其上告漢王曰今
不急下吾烹太公漢王曰吾與若俱北面受命懷王約
爲兄弟吾翁卽若翁必欲烹而翁幸分我一杯羹羽怒

欲殺之項伯曰爲天下者不顧家殺之無益祇益禍耳
于是漢王羽相與臨廣武之間而語羽欲與漢王獨身
挑戰漢王數羽十罪羽大怒伏弩射中漢王傷臂乃捫
足曰虜中吾指漢王病創卧張良彊請漢王起行勞軍
以安士卒漢王出行軍疾甚因馳入成臯疾瘳西入關
至櫟陽存問父老置酒梟故塞王欣頭櫟陽市留四日
復如軍軍廣武關中兵益出而彭越田橫又居梁地往
來苦楚兵絕楚糧食項羽自知少助食盡韓信又進兵
擊楚患之乃與漢約中分天下割洪溝以西爲漢以東
爲楚九月歸太公呂后羽解而東歸漢王欲西歸張良

陳平諫曰今漢有天下大半而諸侯皆附楚兵罷食盡
此天亡之時不因其幾而遂取之所謂養虎自遺患也
漢王從之五年冬漢王追項羽至陽夏南止軍與齊王
信魏相國越期會擊楚至固陵不會楚擊漢軍大破之
漢王復入壁深塹而守謂張良曰諸侯不從奈何良對
曰楚兵且破二人未有分地其不至固宜君王能與共
天下可立致也齊王信之立非君王意信亦不自堅彭
越本定梁地始君王以魏豹故拜越爲相國今豹死越
亦望王而君王不早定今能取睢陽以北至穀城皆以
王彭越從陳以東傅海與齊王信信家在楚其意欲復

得故邑能出指此地以許兩人使各自爲戰則楚易敗也於是漢王發使使韓信彭越至皆引兵來十二月圍羽垓下羽夜聞漢軍四面皆楚歌知盡得楚地羽與數百騎走是以兵大敗灌嬰追斬羽東城楚地悉定二月漢王卽皇帝位秋燕王臧荼反上自將征之九月虜荼六年冬人告楚王信謀反上用陳平計僞遊雲夢會諸侯于陳信迎謁因執之還至雒陽赦信以爲淮陰侯秋九月匈奴圍韓王信于馬邑信降匈奴七年冬上自將擊信于銅鞮連戰乘勝遂北至樓煩會大寒士卒墮指遂至平城爲匈奴所圍七日用陳平秘計得出十年代

相國陳豨反上令周昌選趙壯士可令將昌白見四人上媢罵曰豎子能爲將乎四人慙皆伏地上各封千戶以爲將左右諫曰從入蜀漢伐楚賞未徧行今封此何功上曰非汝所知陳豨反趙代地皆豨有吾以羽檄徵天下兵未有至者今計唯獨邯鄲中兵耳吾何愛四千戶不以慰趙子弟乎是月也將軍柴武斬韓王信于參合上還雒陽秋淮南王布反上自將擊布十二年冬十月上破布軍于會稽布走令別將追之斬布番陽上還過沛畱置酒沛宮悉召故人父老子弟佐酒發沛中兒得百二十人教之歌酒酣上擊筑自歌曰大風起兮雲

飛揚威加海內兮歸故鄉安得猛士兮守四方令兒皆和習之上乃起舞忼慨傷懷泣數行下謂沛父兄曰游子悲故鄉吾雖都關中萬歲之後吾魂魄猶思家沛且朕自沛公以誅暴逆遂有天下其以沛爲朕湯沐邑復其民世世無有所與十一月上自淮南還過魯以太牢祠孔子西還長安刑白馬與蕭何等諸大臣啗血盟曰非劉氏不王非有功不侯非劉氏而王者天下共擊之藏盟金匱剖符分封使世襲其爵而誓之曰黃河如帶泰山如礪國以永存爰及苗裔呂后問曰陛下百歲後蕭相國旣死誰令代之上曰曹參可問其次曰王陵可

然少戇陳平可以助之陳平知有餘然難獨任周勃重厚少文然安劉氏者必勃也可令爲太尉呂后復問其次上曰此後亦非乃所知也夏四月帝崩壽五十三卽位七年起兵五年共十二年呂后與審食其謀曰諸侯故與帝爲編戶民北面爲臣心常鞅鞅今乃事少主非盡族是天下不安以故不發喪或以語酈商酈商見審食其曰聞帝已崩四日不發喪欲誅諸將誠如此天下危矣陳平灌嬰將十萬守滎陽樊噲周勃將二十萬定燕代比聞帝崩諸將皆誅必連兵還嚮以攻關中人臣內叛諸將外反亡可躋足待也審食其入言之乃發喪

大赦天下葬長陵

盡赦天下不安以姑不發喪以臨灑商灑商是春
姑與帝為讎只與北面為臣以帝尊煇煇今以事少主非
出小羊跋與正羊共十二羊呂武與審食其藉曰請美
次上曰此對亦非以祗映世夏四月民帝崩壽五十五
皇少文燕安隆凡皆必使世臣今為太母呂武剪髮
然少願刺平所以祖之刺平味亦籍燕漢國主臣也

第十三卷

世系部 四

皇統

漢武

光武 東

昭烈 蜀

晉武 西

晉元 東

卷十三目錄終

鳥書

卷十三目錄

漢書卷之十三

劉氏鴻書卷之十三

明 宣城劉仲達 纂輯

太史湯賓尹 刪正

皇統 四

漢武帝

孝武皇帝景帝第十子也建元元年詔舉賢良方正直言極諫之士遣使者安車蒲輪束帛加璧徵魯申公三年閩越圍東甌遣嚴助持節發會稽兵浮海救之五年置五經博士六年閩越王郢攻南越遣王恢韓安國擊之越人殺郢降元光二年幸雍祠五時詔問公卿曰朕

鳥書

卷十三

世系

節子女以配單于金帛文繡賂之甚厚單于待命加媿
侵盜亡已邊境被害朕甚憫之乃以韓安國李廣王恢
等將三十萬衆屯馬邑谷中誘至單于欲襲擊之單于
入塞覺之走六年匈奴入上谷殺略吏民遣衛青出上
谷公孫敖出代公孫賀出雲中李廣出鴈門青至龍城
獲首虜七百級廣敖失師而還元朔元年冬詔曰公卿
大夫所使總方略一統類廣教化美風俗也夫本仁祖
義褒德錄賢勸善刑暴五帝三王所繇昌也朕夙興夜
寐嘉與宇內之士臻於斯路故旅耆老復孝敬選豪俊
講文學稽叅政事祈進民心深詔執事興廉舉孝庶幾

成風紹休聖緒今或至闔郡而不薦一人是化不下究
而積行之君子雍於上聞也二千石官長紀綱人倫將
何以佐朕燭幽隱勸元元厲蒸庶崇鄉黨之訓哉且進
賢受上賞蔽賢蒙顯戮古之道也其與中二千石禮官
博士議不舉者罪秋匈奴入遼西殺太守入漁陽鴈門
敗都尉殺略二千餘人遣將軍衛青出鴈門將軍李息
出代獲首虜數千級二年匈奴入上谷漁陽殺略吏民
千餘人遣將軍衛青李息出雲中至高闕遂西至符離
獲首虜數千級收河南地置朔方五原郡四年冬行幸
甘泉夏匈奴入代定襄上郡殺略數千人五年春大將

軍衛青將六將軍兵十餘萬人出朔方高闕獲首虜萬五千級夏丞相公孫弘請爲博士置弟子員由是學者益廣秋匈奴入代殺都尉六年春大將軍衛青將六將軍兵十餘萬騎出定襄斬首三千餘級而還夏四月衛青復將六將軍絕幕大克獲前將軍趙信軍敗降匈奴右將軍蘇建亡軍獨身脫還贖爲庶人六月詔置武功賞官以寵戰士元狩元年冬十月行幸雍祠五時獲白麟作白麟之歌十一月淮南王安衡山王賜謀反誅黨與死者數萬人二年冬行幸雍祠五時遣驃騎將軍霍去病出隴西至臯蘭斬首八千餘級夏將軍去病公孫敖出北地二千餘里過居延斬首虜三萬餘級秋匈奴入鴈門殺略數百人遣衛尉張騫郎中令李廣若出右北平廣殺匈奴二千餘人盡亾其軍四千人獨身脫還及公孫敖張騫皆後期當斬贖爲庶人是月也匈奴昆邪王殺休屠王并將其衆合四萬餘人來降置五屬國以處之以其地爲武威酒泉郡三年秋匈奴入右北平定襄殺略千餘人四年夏大將軍將四將軍出定襄將軍去病出代青至漠北圍單于斬首萬九千級至闐顏山乃還去病與左賢王戰斬獲首虜七萬餘級封狼居胥山乃還兩軍戰士死者數萬人前將軍廣後將軍食

焉書

其皆後期廣自殺食其贖死五年春丞相李蔡有罪自
殺六年秋大司馬驃騎將軍去病薨元鼎元年得鼎汾
水上二年冬丞相莊青翟下獄死春起栢梁臺四年冬
行幸雍祠五時十一月立后土祠於汾陰睢上還至洛
陽封周孽子嘉爲周子南君以奉周祀封方士欒大爲
樂通侯位上將軍六月得寶鼎后土祠旁秋馬生渥洼
水中作寶鼎天馬之歌五年冬行幸雍祠五時遂踰隴
登空同西臨祖厲河而還夏四月南越王相呂嘉反殺
漢使者秋遣伏波將軍路博德等將兵并馳義侯遺別
將巴蜀罪人發夜郎兵下牂牁江咸會番禺九月丞相

趙周下獄死樂通侯欒大坐誣罔要斬西羌衆十萬人
反與匈奴通六年發隴西天水安定騎士及中尉河南
河內卒十萬人遣將軍李息郎中令徐自爲征西羌平
之馳義侯遺兵未及下便令征西南夷遂定越地以爲
南海蒼梧鬱林合浦交趾九真日南珠厓儋耳郡定西
南夷以爲武都牂牁越雋沈黎文山郡秋東越王餘善
反遣橫海將軍韓說中允王溫舒出會稽樓船將軍楊
僕出豫章擊之元封元年冬詔曰南越東甌咸伏其辜
西蠻北夷頗未輯睦朕將巡邊垂擇兵振旅躬秉武節
置十二部將軍親帥師焉行自雲陽北歷上郡西河五

原出長城北登單于臺至朔方臨北河勒兵十八萬騎
旌旗徑千餘里威震匈奴遣使者告單于曰南越王頭
已縣於漢北闕矣單于能戰天子自將待邊不能亟來
臣服何但亾匿漠北寒苦之地爲匈奴讐焉還祠黃帝
於橋山迺歸甘泉是月也東越殺王餘善降乃詔曰東
越險阻反覆爲後世患乃盡遷其民於江淮春行幸緱
氏詔曰朕用事華山至於中嶽翊日親登嵩高御史乘
屬在廟旁吏卒咸聞呼萬歲者三令加增太室祠行遂
東巡海上夏四月還登封泰山降坐明堂詔以十月爲
元封元年復東巡海上至碣石自遼西歷北邊九原歸

於甘泉二年春幸緱氏遂至東萊夏還祠泰山至瓠子
臨決河命從臣將軍以下皆負薪塞河堤作瓠子之歌
還作甘泉通天臺長安飛簾館詔曰甘泉宮內中產芝
九莖連葉其赦天下賜雲陽都百戶牛酒作芝房之歌
秋朝鮮叛遣樓船將軍楊僕左將軍荀彘將應募罪人
擊之又遣將軍郭昌中郎將衛廣發巴蜀兵平西南夷
未服者以爲益州郡三年春作角抵戲三百里內皆來
觀夏朝鮮斬其王右渠降以其地爲樂浪臨屯玄菟真
番郡四年冬行幸雍祠五時通回中道遂北出蕭關歷
獨鹿鳴澤自代而還五年冬行南巡狩至於盛唐望祀

虞舜於九嶷登瀟天柱山自尋陽浮江親射蛟江中獲
之舳艫千里薄樅陽而出作盛唐樅陽之歌遂北至琅
琊並海所過禮祠其名山大川春還至泰山增封祠高
祖于明堂以配上帝因朝諸侯王列侯受郡國計赦天
下所幸縣毋出今年租賦秋大司馬大將軍青薨六年
詔曰蓋有非常之功必待非常之人故馬或奔蹏而致
千里士或有負俗之累而立功名夫泛駕之馬斲弛之
士亦在御之而已其令州郡察吏民舉茂材異等堪爲
將相及使絕國者大初元年冬行幸泰山乙酉栢梁臺
災十二月禮高里祠后土東臨渤海望祠蓬萊二月起

建章宮夏五月正歷以正月爲歲首色尚黃數用五定
官名協音律遣因杆將軍公孫敖築塞外受降城秋行
幸安定遣貳師將軍李廣利發天下謫民西征大宛二
年行幸河東祠后土秋遣浚稽將軍趙破奴二萬騎出
朔方擊匈奴不還三年春行東巡海上夏還修封泰山
禮石閣四年春貳師將軍廣利斬大宛王首獲汗血馬
來作西極天馬之歌冬行幸回中天漢元年春行幸甘
泉郊秦時二年春行幸東海還幸回中夏貳師將軍三
萬騎出酒泉與右賢王戰于天山斬首虜萬餘級又遣
因杆將軍出西河騎都尉李陵將步兵五千人出居延

北與單于戰斬首虜萬餘級陵兵敗降匈奴是月也泰山瑯邪羣盜徐勃等阻山攻城遣直指使者暴勝之等衣繡衣杖斧分部逐捕刺史郡守以下皆伏誅三年春行幸泰山修封祀明堂因受計還幸北地祠常山瘞玄玉赦天下行所過毋出田租秋匈奴入鴈門四年發天下七科謫及勇敢士遣貳師將軍李廣利將兵萬騎步兵七萬人出朔方因杆將軍公孫敖萬騎步兵三萬人出鴈門遊擊將軍韓說步兵三萬人出五原彊弩都尉路博德步兵萬餘人與貳師會廣利與單于戰余吾水上敖與左賢王戰不利皆引還太始三年行幸東海獲

赤鴈作赤鴈之歌幸瑯邪禮日成山登之罘浮大海山稱萬歲冬賜行所過戶五千錢鰥寡孤獨帛人一匹四年春行幸泰山夏四月幸不其祠神人於交門宮若有鄉坐拜者作交門之歌征和元年春還行幸建章宮二年春丞相賀下獄死三年春行幸雍至安定北地匈奴入五原酒泉殺兩都尉三月遣貳師將軍廣利將七萬人出五原廣利敗降匈奴六月丞相屈釐下獄要斬妻子梟首四年春行幸東萊臨大海後元元年春正月行幸甘泉郊泰時遂幸安定二年春二月立皇子弗陵爲皇太子丁卯帝崩葬茂陵在位五十四年

漢世祖

世祖光武皇帝諱秀字文叔南陽白水鄉人高祖九世孫也王莽地皇三年宛人李通等以圖讖說光武云劉氏復起李氏爲輔光武初不敢當然獨念天下方亂於是乃與李通從弟軼等謀起兵時年二十八矣兄伯升已會衆起春陵春陵子弟恐懼皆亡逃自匿曰伯升殺我及見光武絳衣大冠皆驚曰謹厚者亦復爲之乃稍自安光武初騎牛殺新野尉乃得馬進攻棘陽拔之更始元年漢軍大破莽兵於泚水立劉聖公爲天子別與諸將徇昆陽定陵鄧皆下之莽遣王尋王邑將兵百萬

令盡驅諸猛獸虎豹犀象之屬以助威武諸將皆惶怖欲散走光武曰今兵穀旣少而外寇彊大并力禦之或可立功如欲分散勢無兩全諸將咸怒曰劉將軍何敢如是會候騎還言大兵且至城北軍陳數百里不見其後諸將遽相謂曰更請劉將軍計之光武復爲圖畫成敗諸將皆曰諾光武遂與營部俱進自將步騎千餘前去大軍四五里而陳尋邑亦遣兵數千合戰光武奔之斬首數十級諸部喜曰劉將軍平生見小敵怯今見大敵勇甚可怪也時伯升已拔宛光武因復徇下潁陽會伯升爲更始所害光武自父城馳詣宛稱謝司徒官屬

來迎弔光武惟深引過不敢自言昆陽之功又不敢爲伯升服喪飲食語笑如平常九月三輔豪傑共誅王莽傳首詣宛更始乃議都洛陽復遣光武行大司馬事持節北渡河鎮慰州郡光武除王莽苛政復漢官名吏人喜悅會王子林詐以卜者王郎爲成帝子子輿立爲天子都邯鄲遣使者降下郡國光武以王郎新盛乃北徇薊王郎移檄購光武十萬戶而故廣陽王子劉接起兵薊中以應郎城內擾亂轉相驚恐於是光武趣駕南轅晨夜不敢入城邑舍食道傍至饒陽官屬皆乏食光武乃馳晨夜兼行至滹沱河無船王霸詭言冰堅可渡至

則水果合遂得渡有白衣老父指曰努力信都郡爲長安守去此八十里光武卽馳赴之因發旁縣得四千人先擊堂陽貫縣皆降之王莽和戎卒正邳彤亦舉郡降又昌城人劉植宋子人耿純各率宗親子弟據其縣邑以奉光武於是北降下曲陽衆稍合樂附者至有數萬人復北擊中山等處移檄邊部共擊邯鄲郡縣還復響應因入趙界拔廣阿會上谷太守耿況漁陽太守彭寵各遣其將吳漢寇恂等將突騎來助擊王郎時更始已入長安亦遣其尚書僕射謝躬討郎光武因大饗士卒東圍鉅鹿逆戰南蠻斬首數千級進圍邯鄲連戰破之

拔其城誅王郎收得吏人與郎交關文書數千章盡燒之曰令反側子自安更始乃遣持節立光武爲蕭王是時更始政亂四方背叛梁王劉永擅命睢陽公孫述稱王巴蜀李憲自立爲睢南王秦豐自號楚黎王張步起琅邪董憲起東海延岑起漢中田戎起夷陵又別號諸賊銅馬大彤高湖重連鐵脰大捨尤來上江青犢五校檀鄉五幡五樓富平獲索等各領部曲衆合數百萬人所在寇掠光武先擊銅馬於鄴迨至館陶大破之受降未盡而高湖重連從東南來與銅馬餘衆合光武復大破降之封其渠帥爲列侯青犢赤眉賊入函谷關光武乃遣鄧禹引兵而西以乘更始赤眉之亂建武元年光武北擊尤來大捨五幡於元氏連破之乘勝輕進幾爲虜啗大軍復進至安次與戰破之賊入漁陽光武遣吳漢率耿弇陳俊馬武等追戰於潞東及之平谷復大破之於是諸將議上尊號光武屢拒不行耿純進曰天下士大夫捐親戚棄土壤從大王於矢石之間者固望其攀龍鱗附鳳翼以成所志耳今大王畱時逆衆不正號位純恐士大夫望絕計窮則有去歸之思大衆一散難可復合言甚誠切至鄙彊華自關中奉赤伏符曰劉秀發兵捕不道四夷雲集龍鬪野四七之際火爲主羣臣

因復奏請光武於是設壇塲鄗南卽皇帝位建元建武
大赦天下是月赤眉立劉盆子爲天子九月赤眉入長
安更始奔高陵十月車駕入洛陽幸南宮遂定都焉十
二月赤眉殺更始而隗囂據隴右二年大司馬吳漢率
九將軍擊檀鄉賊於鄴東大破降之秋帝自將征五校
大破五校於蕤陽降之三年馮異與赤眉戰於崤底大
破之餘衆南向宜陽帝自將征之己亥親勒六軍大陳
戎馬大司馬吳漢精卒當前中軍次之驍騎武衛分陳
左右赤眉望見震怖丙午赤眉君臣面縛奉高皇帝璽
綬出降四年吳漢擊五校賊於箕山大破之五年耿弇
等降張步於臨淄平齊地六年山東諸郡悉平七年帝
自征隗囂九年隗囂病死衆復立囂子純爲王十年來
歙等大破隗純於落門純降隴右平十二年吳漢臧宮
率舟師大破公孫述於廣都成都蜀平十三年大司馬
吳漢還京十四年莎車國鄯善國遣使奉獻十六年交
趾女子徵側反郡國大姓及兵長羣盜處處並起攻劫
在所害殺長吏郡縣追討到則解散去復屯結青徐幽
冀四州尤甚冬遣使者下郡國聽羣盜自相糾擿五人
共斬一人者除其罪於是更相追捕賊並解散十七年
廢皇后郭氏立貴人陰氏爲皇后甲申幸春陵置酒作

樂時宗室諸母因酣悅相與語曰文叔少時謹言與人
 不款曲唯直柔耳今乃能如此帝聞之大笑曰吾理天
 下亦欲以柔道行之十八年遣伏波將軍馬援等擊交
 阯十九年援破交阯斬徵側因擊破九真賊盡降之六
 月詔以皇太子彊為東海王立東海王陽為皇太子改
 名莊二十一年遣馬援出塞擊烏桓冬鄯善王車師王
 等十六國皆遣子入侍奉獻願請都護二十二年烏桓
 擊破匈奴詔罷諸邊郡亭候吏卒二十三年高句驪率種
 人詣樂浪內屬二十四年匈奴薁鞬日逐王比遣使款
 五原塞求扞禦北虜二十五年烏桓來朝南單于貢獻

稱臣又遣其左賢王擊破北匈奴却地千餘里伏波將
 軍馬援等破武陵蠻於臨沅叛蠻悉降二十六年作壽
 陵二十七年益州郡徼外蠻夷率種人內屬北匈奴遣
 使詣武威貢獻乞和親三十年鮮卑大人內屬朝賀中
 元元年使司空告祠高廟薄太后母德慈仁孝文皇帝
 賢明臨國子孫賴福延祚至今其上薄太后尊號曰高
 皇后配食地祇遷呂太后廟主于園四時二祭二年東
 夷倭奴國王遣使奉獻二月帝崩在位三十三年年六
 十二初皇考南頓君為濟陽令生光武於縣舍有赤光
 照室是歲縣界有嘉禾生一莖九穗因名曰秀及王莽

纂位忌惡劉氏以錢文有金刀故改爲貨泉或以貨泉
字又爲白水真人云後望氣者蘇伯阿爲王莽使至南
陽遙望見春陵郭喏曰氣佳哉鬱鬱蔥蔥然及始起兵
還春陵遠望舍南火光赫赫屬天有頃不見王者受命
信有符乎

蜀漢昭烈

先主劉備涿郡人景帝子中山靖王之後也少孤貧與
母販屨爲業常與公孫瓚同師盧植由是往依瓚瓚以
爲平原相常山趙雲來詣瓚備見而奇之雲遂從備興
平元年徐州牧陶謙疾篤謂別駕東海糜竺曰非劉備

不能安此州也謙卒竺率州人迎備備遂領徐州建安
元年袁術攻劉備以爭徐州備使張飛守下邳自將拒
術袁術與呂布書勸令襲下邳布乃引兵水陸東下張
飛敗走布遂虜備妻子備請降布布亦忿袁術乃召備
復以爲豫州刺史與并勢擊術使屯小沛備因合兵得
萬餘人布惡之乃復攻備備敗走歸曹操操厚遇之以
爲豫州牧遂益其兵給糧食使東至沛收散兵以圖布
三年呂布復與袁術通遣其將高順及張遼攻劉備曹
操遣將夏侯惇救之爲順等所敗順等破沛城虜備妻
子而還備復走操操謂備曰今天下英雄惟使君與操

耳本初之徒不足數也備方食值雷震失匙箸會操遣
備邀袁術術既南走備遂殺徐州刺史車胄留關羽守
下邳身還小沛郡縣多叛操爲備備將數萬人遣使與
袁紹連兵操遂自擊備破之獲其妻子進拔下邳擒關
羽備乃奔青州因袁譚以歸袁紹紹聞備至身去鄴二
百里迎之五年秋劉備略汝穎之間還至紹軍陰欲離
紹紹乃遣備將本兵復至汝南六年秋操自擊備於汝
南備奔劉表表聞備至自出郊迎以上賓禮待之益其
兵使屯新野備後在荊州數年一日至廁所慨然流涕
表怪問故備曰平常身不離鞍髀骨皆消今不復騎髀

裏肉生日月如流老將至矣而功業不建是以悲耳十
三年操軍至新野劉琮以荊州降琮表子也諸葛亮勸
備攻琮以取荊州備曰劉荊州臨亡託我以孤遺背信
自濟吾所不爲遂去過襄陽保江陵操以江陵有軍實
恐備據之乃釋輜重將精騎五千急追備一日一夜行
三百餘里追及於當陽之長坂備棄妻子與諸葛亮張
飛趙雲等數十騎遁去或謂備曰趙雲北走矣備以手
戟指之曰子龍不棄我也頃之雲抱劉禪與關羽船會
因得濟沔備遂因魯肅以歸孫權與權共破操於赤壁
十二月備引兵南徇武陵長沙桂陽零陵諸郡皆降備

以諸葛亮爲軍師使督零陵桂陽長沙三郡調其租稅以充軍實以趙雲爲桂陽太守十四年冬孫權以備領荊州牧周瑜分南岸地以給備備立營於油口改名公安權復以妹妻備十五年冬劉表故吏士多歸備備以周瑜所給地少不足容衆乃自詣京見孫權求都督荊州周瑜勸留之權不聽備還公安聞之嘆曰天下智謀之士所見略同時孔明諫孤莫行其意亦慮此也及周瑜卒魯肅代瑜肅乃勸權以荊州借備與共拒曹操十六年冬曹操遣鍾繇向漢中蜀州牧劉璋別駕張松說璋曰曹公兵無敵於天下若因張魯之資以取蜀土誰

能禦之劉豫州使君之宗室若使之討魯魯必破矣魯破則益州強曹公雖來無能爲也璋然之乃遣法正迎備法正至荊州遂勸備取益州龐統亦言於備備曰今日與吾爲水火者曹操也操以急吾以寬操以暴吾以仁操以譎吾以忠每與操反事乃可成今以小利而失信義於天下奈何統曰逆取順守古人所貴若事定之後封以大國何負於信今日不取終爲人利耳備以爲然乃將步卒數萬人入益州劉璋敕在所供奉備備入境如歸前後贈遺以巨億計備至巴郡太守嚴顏拊心嘆曰此所謂獨坐窮山放虎自衛者也備至涪璋率步

卒三萬餘人車乘帳幔精光耀日往會之張松令法正
白備便於會襲璋備曰此事不可倉卒璋與備歡飲百
餘日璋增備兵厚加資給使擊張魯又令督白水軍備
并軍三萬餘人北到葭萌未即討魯厚樹恩德以收衆
心十七年冬備在葭萌十八年夏備進據涪城十九年
備進圍成都璋出降備自領益州牧以諸葛亮爲軍師
將軍於是董和黃權李嚴等本璋之所授用也吳懿等
璋之婚親也彭萊璋之所益也劉巴宿昔之所怨恨
也備皆處之顯任盡其器能有志之士無不兢勸益州
之民是以太和初赤壁之役權遣使報備曰張魯王巴

漢爲曹操耳目規圖益州若操得蜀則荊州危矣今欲
先攻取璋進討張魯首尾相連一統吳楚雖有十操無
所憂也於是遂遣周瑜率水軍往夏口備不聽軍過謂
瑜曰汝欲取蜀吾當被髮入山不失信於天下也及備
取益州權聞之怒曰猾虜乃敢挾詐如此二十年孫權
以備已得益州乃遣呂蒙襲奪長沙零陵桂陽三郡備
引兵五萬下公安令關羽入益陽是歲曹操將擊張魯
備聞之乃與權連和分荊州江夏長沙桂陽東屬南郡
零陵武陵西屬引兵還江州二十三年夏備屯陽平關
魏大將夏侯淵督張郃徐晃等與備相距備遣絕馬鳴

閤道徐晃擊破之郃屯廣右備又攻之不能克乃急書發益州兵諸葛亮以問從事犍爲楊洪洪曰漢中益州咽喉若無漢中則無蜀矣此家門之禍也發兵何疑二十四年春操自長安出斜谷軍遮要以臨漢中備曰曹公雖來無能爲也我必有漢川矣乃歛衆拒險終不交鋒操運米北山下黃忠引兵取之過期不還趙雲將數十騎出營視之值操揚兵大出雲卒與相遇遂前突其陣且鬪且却魏兵散而復合追至營下雲入營便大開門偃旗息鼓魏兵疑雲有伏引去雲令擂鼓以勁弩隨後追射魏兵驚愕自相蹂踐盡墮漢水中備明日

來視雲營視其戰處曰子龍一身都是膽也操與備相守月餘魏軍士多亡夏五月操引兵出漢中諸軍還長安劉備遂有漢中秋七月劉備自稱漢中王立子禪爲太子是年孫權襲殺關羽取荊州魏文帝黃初二年春蜀中傳言漢帝已遇害於是漢中王發喪制服夏四月漢中王卽帝位於武擔之南大赦改元章武初先主忿孫權襲關羽至是遂帥諸軍伐吳竟爲陸遜所敗三年夏先主薨於永安宮時年六十三矣遺詔勅後主曰勉之勉之勿以小惡而爲之勿以小善而勿爲惟賢惟德可以服人吾亾之後汝兄弟父事丞相可也

西晉武帝

武帝姓司馬名炎字安世祖懿初從魏武辟為文學掾父昭居相國進爵為王昭卒炎嗣晉上位尋受魏禪即皇帝位都洛陽以金德王今西京河南府是也追尊祖懿為宣帝伯父師為景帝父昭為文帝帝字量弘厚明達好謀能納直言承魏氏刻薄之風欲矯以仁儉有司言御座青絲絃斷詔以青麻代之初置諫官以傅元皇甫陶為之元上疏乞舉清遠之臣以厚風節退虛鄙之子以懲不恪武帝嘉納其言號泰始十年改咸寧五年太康十年共二十五年

東晉元帝

元帝諱勰字景文司馬懿曾孫琅琊恭王子也初鎮建鄴以及懷帝被虜愍帝嗣立進位丞相都督中外諸軍事西都不守羣臣因請即帝位既而王敦內叛四方貢獻多入敦府將相岳牧皆出其門元帝遂憂憤成疾崩在位六年初玄石圖有牛繼馬後之讖故司馬懿深忌牛氏為二榼共一口以貯酒懿先飲佳者而以毒酒鳩其將牛金乃恭王妃夏侯氏竟通小吏牛氏而生元帝

劉氏鴻書卷終

漢書卷之十四

劉氏鴻書卷之十四

明 宣城劉仲達 纂輯

太史湯賓尹 刪正

皇統^五

劉宋武帝

武帝裕小字寄奴素貧時人莫知唯琅琊王謐知之裕常負刁達社錢三萬被達執不得脫謐代之償故裕德謐後裕伐荻新州有大蛇數丈裕射之明日至聞有杵臼聲見童子數人皆青衣搗藥裕問其故荅曰我王為劉寄奴所射合藥傅之耳裕曰王何不遂殺之曰劉寄

鴻書

卷十四

皇統三

奴王者不死裕叱之皆散走裕遂收藥而反以傅金創無不立驗孫恩作亂於會稽朝廷遣將軍劉牢之往討以裕參府軍事牢之遣裕與數十人覘賊卒遇賊衆數千裕與戰獨奮長刀殺傷賊衆已而衆騎並至遂平山陰恩遁入海元興元年桓玄篡位遷晉主於潯陽乃與何無忌及弟道規沛國劉毅等密謀起兵玄聞義兵起懼謂所親曰劉裕一世之雄劉毅家無擔石之儲樗蒲一擲百萬何無忌劉牢之甥酷似其舅共舉大事何謂無成時衆咸推裕爲盟主庚申裕鎮石頭立畱臺總百官焚桓溫主於宣陽門外造晉新主於太廟命尚書王叡率百官奉迎乘輿玄挾晉主走江陵劉毅何無忌劉道規等追之大破玄軍於崢嶸洲玄復挾晉主入蜀益州督護馮遷斬玄晉主至自江陵詔進裕侍中車騎將軍五年南燕主慕容超大掠淮北裕抗表伐之進至琅琊或謂裕曰燕人若塞大峴之險或堅壁清野大軍深入將奈何裕曰吾慮之熟矣鮮卑貪婪不知遠計必不能守險清野超聞晉師至引羣臣會議公孫五樓曰吳兵利在速戰不可爭鋒宜據大峴沮其銳氣然後徐簡精騎循海而南絕其糧道別敕段暉帥兗州之衆緣山東下腹背擊之此上策也各命守宰依險自固芟除禾

若使敵無所資彼僑軍無食求戰不得旬月之間可以
制此中策也若縱賊入峴出城逆戰非勝筭矣超不
聽裕過大峴燕兵不出裕喜形於色左右曰公未見敵
而喜何也裕曰兵已過險士有必死之志餘糧棲畝人
無匱乏之憂虜已入吾掌中矣六月裕與燕兵戰於臨
朐南叅軍胡藩言於裕曰燕悉兵出戰臨朐城中畱守
必寡願以奇兵從間道取其城裕從之丙子克其大城
於是因齊地糧儲悉停江淮漕運丁亥劉裕悉衆攻城
或曰今日徃亡不利裕曰我徃彼亡何爲不利遂進攻
獲超送建康斬之南燕滅盧循反廣州時裕將鎮下邳

進攻河洛聞循反乃班師次山陽卷甲徑造江上知賊
尚未至乃大喜四月裕至都時鎮南將軍何無忌與循
衆徐道覆戰死孟昶懼欲擁主過江裕曰今重鎮外傾
強敵內迫人情危駭莫有固志一旦遷動便自土崩江
北亦安得至設使得至不過延日月耳今兵士雖少猶
足一戰乃移鎮石城賊大至裕曰賊若新亭直上且將
避之若回泊蔡洲成擒耳徐道覆欲自新亭焚舟而戰
循多疑少決果泊蔡洲裕登石頭使建威將軍孫處自
海道襲番禺戒之曰我于二月必破妖寇卿亦足至番
禺先傾其巢窟也二月盧循兵敗回至番禺果爲孫處

所破循走交州刺史杜惠度斬盧循父子函七首送都
下廣州平八年荊州刺史劉道規患疾以豫州刺史劉
毅代之毅與裕俱興復晉室雖權事推裕而心不服裕
知毅終爲異遣叅軍王鎮惡襲江陵克之毅及黨與皆
伏誅先是譙縱據蜀裕遣劉敬宣往伐之譙縱求救於
秦秦兵至敬宣引還至是裕復謀伐蜀裕以朱齡石有
武幹以爲益州刺史裕與齡石密謀進取曰劉敬宣往
年出黃虎無功而退賊謂我今應從外水往而料我當
出其不意猶從內水來也如此必以重兵守涪城備內
道若向黃虎正墮其計今大衆宜自外水取成都而以

疑兵出內水因函書封齡石署函邊曰至白帝乃開視
朱齡石等至白帝發函見書衆軍悉從外水取成都滅
熹從中水取廣漢老弱乘高艦千餘從內水向黃虎於
是諸軍倍道兼行尅日破城縱自縊成都平十三年衆
軍至洛圍金墉降之裕修復晉五陵置守衛三月裕率
大軍入河五月帝至洛陽謁晉五陵八月扶風太守沈
田子大破姚泓軍於藍田王鎮惡尅長安擒姚泓而關
洛平十月裕進爵爲王裕欲息駕長安經畧趙魏聞前
將軍劉穆之卒乃歸歸遂代晉國號宋三年宋主殂年
六十葬蔣山謚武皇帝

南齊高帝

高帝蕭道成東海蘭陵人也宋明帝卽位以道成非人臣相而人間流言咸云道成當爲天子故明帝疑之及蒼梧王卽位以道成爲右衛將軍領衛尉元徽二年江州桂陽王休範舉兵尋陽道成曰昔上流謀逆皆因淹緩致敗休範必遠懲前失輕兵急下乘我無備請頓新亭以當其鋒乃單車白服出新亭壘未畢賊前軍已至乃使員外郎王敬則浮艤高戰大破之斬休範賊帥丁文豪軍至朱雀航王道隆善勳並戰沒賊進至杜姥宅府軍長史褚澄又開東府納賊張永兵潰於白下宮內

傳言新亭亦陷太后執蒼梧王手泣曰事敗矣道成急遣軍士陳顯達張敬兒等從石頭濟淮間道自承明門入衛宮闕時休範典籤許公與詐稱休範在新亭士庶惶惑詣壘投名者以千數及至乃知是道成道成隨得輒燒焚之登城謂曰劉休範父子已戮身是蕭平南汝等名字皆已焚燒勿懼也遂分遣衆軍擊平賊道成振旅凱入百姓緣道聚觀曰全國家者此公也後蒼梧兇暴且道成威名旣重蒼梧深忌之道成憂懼乃密與袁粲褚淵謀廢立七月七夕楊玉夫等殺之而立順帝道成自爲太尉都督十六州諸軍事謀伐宋建元元年道

成卽帝位國號齊封順帝爲汝陰王仍弑之宋宗室無少長皆死齊主博學善屬文工草隸書弈棋第二品每曰使我臨天下十年當使黃金與土同價所著文詔中書侍郎江淹撰次之又詔東觀學士撰史林三十篇皇覽之流也在位三年

梁武帝

武帝蕭衍蘭陵人生有異光狀貌殊特爲兒時能蹈空行及長博學多通有文武才幹初爲衛軍王儉東閣祭酒竟陵王子良開西邸招文學衍與沈約謝朓等並游號八友齊明帝將廢鬱林毋與衍密謀及齊明卽位性

猜忌衍避時嫌解遣部曲先是雍州相傳樊城有王氣至是齊明崩遺詔以衍爲都督雍州刺史衍長兄懿被害信至衍乃起兵殺東昏進爵爲王天監元年衍自立爲帝國號梁八年魏取梁三關十六年用釋氏法長齋食惟菜羹糲飯又詔宗廟牲牢皆以麩爲之普通五年魏有六鎮之亂梁復取三關改元大通梁主再舍身同泰寺釋御服持法衣行清淨大捨親爲四衆講涅槃經羣臣以錢一億萬奉贖表請還宮三請乃許三年太子統卒太子好讀書屬文謚曰昭明大同三年修長干寺阿育王塔時王侯子弟多驕淫不法上年老厭萬幾又

專精佛戒每斷重罪則終日不懌或謀反逆事覺亦泣而宥之由是王侯益橫大同元年梁主幸同泰寺講三慧經太清元年高歡卒侯景來降二年侯景叛襲破臺城梁主崩年八十三謚武梁主少而篤學雖萬機多務猶卷不輟手燃燭常至戊夜撰通史諸經牋奏諸文及陰陽緯候卜筮占決草隸尺牘騎射莫不稱妙晚乃溺信佛道在位四十八年

陳武帝

武帝陳霸先少倣宥大志及長涉獵史籍讀兵書明緯候孤虛遁甲之術武勇明達爲當時推服常夢天開數丈有四人朱衣捧日納之口中及覺腹內猶熱以瓦功除太守侯景寇逼霸先將赴援時湘東王繹承制遣征東將軍王僧辯督衆軍討矣景授霸先東揚州刺史三年霸先帥師發自豫章進討侯景景敗走承聖三年進霸先司空及魏平江陵霸先與王僧辯等請晉安王方智以太宰承制晉安王至自尋陽方入居朝堂而齊適送貞陽侯明還僧辯納之霸先固爭不從九月霸先討王僧辯甲辰霸先至石頭遣勇士襲僧辯僧辯就擒於是廢貞陽侯而奉晉安王卽位太平八年霸先代梁卽帝位國號陳在位三年

隋文帝

文帝楊堅武川鎮人也父忠從宇文泰起兵關西位隋國公堅沉深嚴重以父勲授驃騎大將軍周明帝常遣善相者趙昭視之昭詭對曰柱國耳既而陰謂堅曰公當爲天下君必大誅殺而後定武帝卽位堅襲爵隋國公建德中從平齊天元卽位堅以后父徵拜上柱國大司馬時天元病喑不能言靜帝幼冲堅受遺輔政堅夜召太史庾季才曰吾以庸虛受茲顧命天時人事卿以爲何如季才曰天道精微難可意察竊以人事卜之符兆已定季才縱言不可公豈復得爲箕穎之事乎堅默

然久之曰誠如君言堅建隋國大定元年遂篡位降封周靜帝爲介公初隋主輔政楊后雖不預謀然以嗣主幼冲恐權在他族聞之甚喜後知其父有異圖意不平及篡位憤惋愈甚隋主欲奪其志誓不許堅性猜忌既獲大位殺諸王弑靜帝因以文法自矜明察臨下十三年詔營仁壽宮於岐州之北於是夷山堙谷以立宮殿役使嚴急丁夫多死疲頓顛仆者推填坑坎覆以土石因而築爲平地又以盜賊繁多命盜一錢以上皆棄市或三人共盜一瓜事發卽死信任楊素素復任情不平開皇二十年廢太子勇立晉王廣爲太子仁壽四年寢

疾暴崩廣爲之也在位二十四年

隋煬帝

煬帝廣大業元年詔楊素營建東宮內史舍人封德彝等營顯仁宮南接澗北跨洛凡大江以南五嶺以北奇材異石盡輸洛陽又求海內嘉木異草珍禽奇獸以實園苑發河南淮北諸郡民前後百餘萬開導濟渠自西苑引穀洛水以達河復自板渚引河歷滎澤入汴又自大梁之東引汴水入泗以達於淮又發淮南民十餘萬開邗溝自山陽至揚子入江渠凡廣四十步渠旁皆築御道植楊柳自長安至江都離宮四十餘所江南造龍

舟及雜船數萬艘又築西苑周二百里其內爲海爲方丈蓬萊瀛洲諸山臺觀宮殿羅絡山上海北有龍鱗渠縈紆注海緣渠作十六院門門臨渠每院以四品夫人主之宮樹秋冬彫落則剪綵爲花葉色渝則易以新者沼內亦剪綵爲荷菱芡十六院競以肴羞精麗相高求市恩寵主以月夜從宮女數千遊西苑作清夜遊曲馬上奏之秋行至江都發顯仁宮自漕渠出洛口御龍舟四重高四十五尺長二百尺上重有正殿內殿東西廟堂中二重有百二十房下重內侍處之皇后乘翔螭舟制度差小而裝飾無異又有朱鳥蒼螭白虎玄武青

鳧凌波等數千艘後宮諸王公主百官僧尼道士蕃客
乘之共用挽船士八萬餘人謂之御脚皆以錦綵爲袍
又有平乘青龍艨艟八擢數千艘并載兵器帳幕兵士
船艫相接二百餘里照耀川陸騎兵翊兩岸而行所過
州縣五百里內皆令獻食二年東京成詔議定輿服儀
衛制慶課州縣送羽毛水陸禽獸有堪斃耗之用者三
月發江都自伊闕陳法駕備千乘萬騎入東京文武之
盛近世莫及也多製豔篇令樂正造新聲播之音極
哀怨三年下詔安輯河北巡省趙魏車駕過鴈門自榆
林出於是發榆林北境東達於薊開御道長三千里廣

百步突厥啓民可汗與公主來朝行宮乃令爲大帳可
坐數千人以宴啓民及其部落數日駕發榆林甲士五
十餘萬旌旗輜重千里不絕令宇文愷等造觀風行殿
容數百人離合爲之下施輪軸又作行城周一千步以
布衣板樓櫓悉備胡人驚以爲神因大悅賦詩曰呼韓
頓顙至屠耆接踵來何如漢天子空上單于臺吏部侍
郎裴矩知主好遠畧撰西域圖記三卷奏之主於是慨
然慕秦皇漢武之功將通西域自是西域諸胡往來相
繼所經郡縣疲於迎送糜費以萬萬計秋詔發丁勇百
萬築長城西距榆林東至紫河蘇威諫不聽高頰賀若

弼皆坐誹謗被殺四年夏至五原因出塞巡長城行宮
設六合板城載以槍車每頓舍則外其轅以爲外圍內
布鐵菱次施弩牀以繩連機有人觸繩則弩機旋轉向
所觸而發主無日不治宮室然兩京及江都苑囿亭殿
久而益厭矣每遊行左右顧矚無可意者乃備天下山
川之圖躬自歷覽以求勝地可置宮苑者詔於汾水之
源營汾陽宮五年改東京爲東都二月至西京三月西
巡河右至西川陳兵講武將擊吐谷渾其大酋帥男女
十餘萬口來降因謂侍臣曰自古天子有巡狩之禮而
江東諸主多傅脂粉坐深宮不與百姓相見此何禮也

是時天下凡有郡一百九十縣二千二百有奇戶八百
九十萬有奇東西九千餘里南北萬四千八百餘里隋
氏之盛極於此矣車駕東還行經大斗拔谷山路險隘
魚貫而出風雨晦暝饑餒沾濕士卒多凍死後宮妃主
狼狽相失與軍士雜宿山間九月駕入西京冬復詣東
都六年正月主以諸蕃酋長畢集洛陽於端門街盛陳
百戲胡客每過酒食店悉令邀延就坐醉飽而徹不取
其直給之曰中國豐飽酒食例不取直胡人皆驚其黠
者見以繒帛纏樹曰中國亦有貧無衣者不以與之纏
樹爲何市人不能荅三月至江都宮以王世充領江都

宮監冬勅穿江南河自京口至餘杭八百餘里廣十餘丈通龍舟七年自江都至涿郡御龍舟渡河入永濟渠遂下詔討高麗敕幽州總管往東萊海口造船官吏督役晝夜立水中畧不敢息自腰以下皆生蛆於是始相聚爲羣盜所在蜂起攻陷城邑莫能禁止八年至遼東七月進軍至薩水高麗擊之諸軍俱潰初九軍度遼凡三十萬五千及還二千七百人爾九年始募民爲驍勇命衛文昇等輔代王侑守西京二月主復議伐高麗三月至遼東命越王侗留守東都時所在盜起多者十餘萬少者數萬人遼東城旣久不拔主乃遣造布八百

萬貯土欲積爲大道高與城齊使戰士登而攻之又作八輪樓車高出於城欲禦射城內會楊玄感反書至乃還及玄感戰敗主乃曰玄感一呼而從者十萬蓋知人不欲多多卽相聚爲盜爾不盡加誅無以懲後於是又殺三萬餘人百姓凡受玄感賑發者皆阬之感所善文士俱坐徙邊捕誅主善屬文不欲人出其右薛道衡死主曰更能作空梁落燕泥否王胄死主誦其佳句曰庭草無人隨意綠是誰語耶嘗謂侍臣曰天下皆謂朕承藉緒餘設令朕與士大夫高選亦當爲天子矣十年復伐高麗時天下已亂徵兵多不至高麗亦困弊乞降十

月還西京十一年行至太原四月至汾陽宮避暑宮城
迫隘百官士卒布散山谷始畢帥騎數十萬謀襲乘輿
義成公主遣使告變駕馳入鴈門突厥急攻鴈門矢及
御前主大懼抱趙王杲而泣目盡腫納言蘇威侍郎蕭
瑀以帝女嫁外夷必恃中國之援又將士之意恐陛下
既免突厥之患還事高麗若發明詔諭以卽赦高麗專
討突厥則衆心自安矣主乃親巡將士而告之又遣間
使求救於義成公主公主使告始畢始畢解圍去主乃
還九月還至太原蘇威言於主曰今盜賊不息士馬疲
弊願陛下亟還西京深根固本爲社稷計宇文述曰從

官妻子多在東都宜便道向洛陽自潼關而入主從之
至東都顧盼街衢謂侍臣曰猶大有人在意謂曩日平
楊玄感殺人尚少故也玄感之亂龍舟水殿皆爲所焚
詔江都更造凡數千艘制度仍大於舊者十二年詔毘
陵通守集十郡兵數萬人於郡東南起宮苑周圍十二
里內爲十六離宮大都倣東都西苑之制而奇麗過之
又欲築宮於會稽會亂不果七月江都新龍舟成宇文
述勸至江都從之遂至江都以李淵爲太原畱守五月
唐公李淵起兵趣長安迎代王卽位遙尊煬帝爲太上
皇唐高祖淵武德元年隋主至江都荒淫益甚然見天

下已亂亦擾擾不安汲汲顧景惟作吳語嘗夜置酒仰
視天文謂蕭后曰外間大有人圖儂然儂不失爲長城
公卿不失爲沈后且共樂飲耳又引鏡自照顧謂蕭后
曰好頭頸誰當斫之后驚問故笑曰貴賤苦樂迭爲之
亦復何傷主見中原板蕩無心北歸乃命治丹陽宮將
徙都之時從駕驍果多關中人久客思鄉多謀叛歸虎
賁郎將司馬德戡素有寵乃與所善虎賁郎將元禮直
閣裴虔通等謀弑隋主主曰天子死自有法不可加以
鋒刃取鴆酒來文舉等不許乃自解練巾授行達縊殺
之在位十二年

唐高祖太宗

高祖李淵隴西成紀人北涼王暝之後初隋主以淵爲
太原畱守淵四男建成世民玄霸元吉玄霸先死世民
聰明勇決識量過人見隋室方亂傾身下士散財結客
長孫順德與劉弘基避地晉陽與世民及晉陽宮監裴
寂晉陽令劉文靜相與同宿文靜見世民而異之謂寂
曰此非常人豁達類漢高神武同魏祖後文靜坐與李
密連昏繫獄世民就省之文靜曰天下大亂非高光之
才不能定也世民曰安知其無但人不識耳文靜曰今
主上南巡江淮李密圍逼東都羣盜殆以萬數當此之

際有真主驅而用之取天下如反掌耳太原百姓皆避盜入城文靜爲令數年知其豪傑收集可得十萬人尊公所將之兵復且數萬一言出口誰敢不從以此乘虛入關號令天下帝業成矣世民恐淵不從乃說淵曰今主上無道晉陽城外皆爲戰場大人若守小節下有寇盜上有嚴刑危亡無日矣若順民心興義兵即可轉禍而爲福也淵大驚曰汝安得爲此言乎世民徐曰天時人事如此耳淵曰汝慎勿出口明日世民復說曰人皆言李氏應當圖讖故李金才無罪一朝族滅願大人勿疑淵歎曰吾思汝言亦大有理今日破家亡軀亦由汝

化家爲國亦由汝矣裴寂從容言曰二郎陰養死士欲舉大事衆情已協公意何如淵曰事已至此當復奈何正須從之耳文靜乃詐爲敕書發太原西河鴈門馬邑民兵以擊高麗以故人情恟恟思亂者衆世民卽與劉文靜等各出募兵遠近赴集文靜復勸淵與突厥相結資其士馬以益兵勢淵從之遂以子元吉爲太原畱守自帥甲士三萬發晉陽畱諸將圍河東自引軍而西迎立代王遙尊煬爲太上皇世民遂克長安武德元年宇文化及弑隋主於江都唐王淵卽皇帝位立世子建成爲太子世民爲秦王元吉爲齊王秦王遂平涇州降薛

仁杲諸將皆賀因問曰大王一戰而勝既舍步兵又無
攻具直造城下衆皆以爲不克而取之何也秦王曰羅
喉所將皆驍將悍卒吾特出其不意破之斬獲不多緩
之則皆入城未易克也急則散歸隴外折擄虛弱仁杲
破膽不暇爲謀此吾所以克之衆乃服二年唐定租庸
調法已而劉武周等攻陷并州齊王元吉奔長安武周
將宋金剛進逼絳州復陷龍門關中大震秦王請曰太
原王業根本河東殷實京邑所資願假臣精兵三萬必
平武周克復汾晉于是發關中兵以益秦王秦王引兵
自龍門渡河屯柏壁與金剛相持金剛戰屢敗食盡北

走秦王追及大破之乘勝逐北劉弘基諫其深入秦王
曰金剛計窮而走衆心離阻宜乘勢攻之遂策馬而進
追及金剛於鼠雀谷大破之秦王復引兵趣介休尉遲
敬德尋相舉介休降秦王得敬德甚喜以爲統軍使將
其舊衆八千與諸營相叅而并州果復後尋相等復叛
去諸將疑尉遲敬德囚之秦王曰敬德若叛豈在尋相
之後邪引入臥內與之金曰丈夫意氣相期勿以小嫌
介意吾終不信讒言以害忠良欲去以此金相資已而
秦王以五百騎行戰地王世充帥驍騎萬餘卒至圍之
單雄信引槊直趣秦王敬德躍馬大呼橫槊刺雄信墜

馬翼秦王出圍更帥騎兵還戰世充大敗僅以身免秦
王兵久圍洛陽城中乏食竇建德悉發衆西救洛陽軍
于成臯之東原遣使與世充相聞記室薛收曰世充所
將皆江淮精銳但乏糧食建德遠來兵亦精銳若縱之
至北兩寇合從轉河北之粟以饋洛陽則戰爭未已今
宜分兵守洛陽堅壁勿戰大王親帥驍銳先據成臯以
逸待勞決可克也建德既破世充自下乃使屈突通等
副齊王元吉圍守東都秦王東趣武牢覘建德之營使
李世勣等將從騎伏於道傍纔餘四騎與之偕進秦王
執弓矢尉遲敬德執槊相隨去建德營三里所建德遊

兵遇之以爲斥候也秦王大呼曰我秦王也引弓射之
斃其將建德卽以六千騎來追從者失色秦王曰汝第
前行吾自與敬德爲殿於是秦王按轡徐行追騎至則
引弓射之隨輒斃追者不敢逼秦王逡巡稍却世勣等
伏兵奮擊大破斬之獲驍將以歸乃爲書報建德諭以
禍福建德畱屯累月已未建德悉衆至秦王升高望之
謂諸將曰賊起山東未見大敵今渡險而囂是無紀律
也逼城而陳有輕我心我按兵不出彼勇氣自衰陳久
卒饑勢將自退今與公等約甫過日中必破之也建德
列陳自辰至午士卒饑倦皆列坐爭水飲秦王命宇文

士及將三百騎經建德陳西馳而南上戒之曰賊若不
動爾速引歸動則引兵東出土及至陳前陳果動秦王
曰可擊矣于是諸軍大戰塵埃漲天秦王率史大柰等
出其陣後張唐旗幟建德將士顧見之大潰建德中槩
墜馬遂囚建德至洛陽城下以示世充世充帥太子羣
臣詣軍門降世充建德之地悉平是年特置天策上將
以授秦王乃開館延文學之士竇建德故將劉黑闥復
叛起兵漳南據洛州盡有建德故地秦王攻拔洛水與
黑闥相持六十餘日秦王度黑闥糧盡必求決戰乃使
人堰洛水上流黑闥果帥兵萬人渡洛水壓唐營而陳

秦王自將精騎擊破之堤水大至衆遂潰黑闥奔突厥
秦王殺太子建成齊王元吉武德九年高祖乃立秦王
爲太子太子卽位改年貞觀於弘文殿聚四庫書二十
餘萬卷置館於殿側選天下文學之士虞世南褚亮姚
思廉歐陽詢蔡允恭蕭德言等以本官兼學士令更日
宿衛聽朝之隙引入內殿講論商確夜分乃罷嘗有白
鵲巢於寢殿槐上合歡如腰鼓左右稱賀上曰瑞在得
賢此何足賀命毀其巢故事軍國大事則中書舍人各
執所見雜署其名謂之五花判事中書侍郎中書令省
審之給事中黃門侍郎駁正之至是上謂珪曰國家本

置中書門下以相檢察正以人心所見互有不同苟論
難往來務求至當舍己從人亦復何傷卿等各當徇公
忘私勿雷同也除鞭背刑上讀明堂鉞灸書云人五臟
之系咸附於背故有是命六年宴玄武門奏七德九功
舞更名破陣樂曰七德舞頒新定五經於天下縱死囚
三百九十人還家復來歸獄詔赦之十七年廢太子承
乾立晉王治爲皇太子高祖今上實錄成上見書六月
四日事語多微隱謂玄齡曰昔周公誅管蔡以安周季
友鳩叔牙以存魯朕之所爲亦類是耳何諱焉二十二
年上作帝範十二篇以賜太子諭之曰吾卽位以來不

善雖多顧弘濟蒼生肇造區夏汝今無我之功勤而承
我之基業苟竭力爲善則國家僅安若驕惰奢縱則一
身不保且成遲敗速者國也失易得難者位也可不惜
哉貞觀二十三年帝崩壽五十二

五代梁太祖

朱溫宋州碭山人少孤貧依蕭縣劉崇僖宗乾符二年
黃巢反朱溫從之及巢僭號使屯東渭橋次年陷鄧州
又二年以巢勢威據華州來降王鐸表爲同華節度使
賜名全忠又一年以汴宋軍驕難制移鎮宣武黃巢兵
攻汴州進至大梁全忠告急於克用克用追擊大破之

全忠請入其城置酒甚恭克用醉語侵之全忠不平連車塞路四圍掩擊克用踰垣突走縋城得免上表乞討全忠前後八上朝廷方務姑息惟事和解全忠遂無所憚光啓三年取曹濮洛孟昭宗元年破蔡州取宿州賜爵東平郡王二年兼宣義節度使四年取徐州九年取兗鄆十年取邢洛十二年取河中晉泝沁遼澤潞等州十三年迎車駕圍鳳翔十四年追梁王十五年弑昭宗十六年取襄陽封魏王加九錫弑太后十七年更名晁奉唐帝爲濟陰王卽皇帝位二年之後屢爲晉師所敗悒悒成疾愛假子友文欲授以國黜次子友珪爲萊州刺史友珪雜控鶴軍斬關夜入刺其腹刃出其背矯自立均王友貞起兵討之伏誅立於太梁三年襲晉陽不克四年襲晉陽亦不克九年襲晉德勝亦不克十一年攻晉德勝南城拔之十二年敗績於鄆州梁主不知所爲命皇甫麟斬其首梁亡

五代唐莊宗

莊宗李存勗姓朱耶沙陀人先世事唐賜姓李至存勗滅梁稱帝在位三年國亂被殺晉王之將終也以三矢賜莊宗而告之曰梁仇也燕王吾所立契丹與吾約爲兄弟而皆背晉以歸梁此三者吾遺恨也與爾三矢爾

其無忘乃父之志莊宗受而藏之於廟其後用兵則遣
從事以一太牢告廟請其矢盛於錦囊負而前驅及凱
旋而納之方其係燕父子以組函梁君臣之首入于太
廟還矢先王而告以成功其意氣之盛可謂壯哉及仇
讐已滅天下已定一夫夜呼亂者四應蒼皇東出未及
見賊而士卒離散君臣相顧不知所歸至於誓天斷髮
泣下沾襟又何衰也方其盛時舉天下豪傑莫能與之
爭及其衰也數十伶人困之而身死莊宗性好俳優又
知音能度曲其戰於胡柳也嬖伶周匝爲梁人所得後
滅梁入汴周匝謁於馬前曰身得不死者教坊使陳俊

內園裁接使儲德源力也莊宗皆許以爲刺史郭崇韜
諫曰陛下所與共取天下者皆英豪忠勇之士今大功
始就封賞未及而先以伶人爲刺史恐失天下心不可
莊宗不聽常與羣優戲四顧而呼曰李天下何在伶人
敬新磨遽前以手批莊宗頰莊宗失色羣伶大驚新磨
曰李天下者一人而已復誰呼邪於是左右皆笑莊宗
大喜殿中多惡犬新磨去一犬逐之新磨倚柱而呼曰
陛下毋縱兒女鬻人莊宗家世夷狄夷狄之人諱狗故
新磨以此譏笑之莊宗大怒彎弓注矢射新磨新磨急
呼曰陛下無殺臣臣與陛下爲一體殺之不祥莊宗大

驚問故對曰陛下開國改元同光天下皆謂陛下同光
帝夫同銅也若殺敬新磨則同無光矣莊宗復大笑時
諸伶獨新磨善俳而無他過惡其敗政亂國甚者景進
史彥瓊郭門高三人門高獨與彥瓊共弑莊宗莊宗崩
五坊人善友聚樂器而焚之李嗣源入洛得其骨葬於
新安之雍陵傳曰君以此始必以此終莊宗好伶而弑
於門高焚以樂器豈不信哉

五代晉高祖

石敬瑭太原汾陽里人其先沙陀種明宗婿也明宗襲
位以爲親軍兵馬侍衛使後授河東節度與潞王從珂
素不相能潞王入大梁見其骨立遂令還鎮許以永不
除代赴任三年欲移之天平遂舉兵反求拔契丹割盧
龍十六州以賂唐盡殺其諸子發兵討之敬瑭以契丹
與戰唐師敗績遂入洛陽稱帝每年奉表契丹稱子稱
臣元年范延克張從賓反六年安重榮安從進反晉王
悒悒成疾殂以少子重睿屬馮道使立之景延廣謂國
家多難宜立長君乃奉齊王重貴爲嗣告哀契丹稱孫
而不稱臣元年契丹渡河李守貞分道擊之始退又攻
瀘州不克遣使分道括率民財二年契丹南下符彥卿
破走之三年契丹大舉入寇晉將王清戰死杜威等以

兵降契丹遂入大梁重貴欲自刎聞待以不死復草降
表面縛待罪并其母妻俱執送黃龍府後又遣之給以
田使耕而食周顯德中自契丹來者云晉主尚無恙壽
三十四而卒晉二二傳十一年

五代漢高祖

劉知遠太原人其先出沙陀後更名高始仕唐爲兵馬
使從石敬瑭與梁人戰敬瑭馬甲爲梁人所斷知遠以
已馬易之敬瑭得免由是親愛甚篤及鎮河東委以心
腹起兵時以爲侍衛馬軍都指揮使卽位後進同平章
事仍鎮河東及殂詔受顧命重貴寢之由是怨望開運

初年詔擊契丹屯樂平不進聞晉主北去自將東迎至
壽陽不及而還稱帝于晉陽契丹退發太原由晉陽六
月入洛陽改國號漢以弟崇爲河東節度使杜重威反
自至澶魏降之以丁未之二月卽位至戊申之正月殂
長子承訓爲開封尹先一年卒次子周王承祐時年十
八召蘇逢吉楊邠史弘肇郭威同受顧命發喪李守貞
趙思綰反以郭威爲四面招慰安撫使踰年思綰降守
貞自殺三年契丹入寇畱郭威鎮鄴時事皆極於弘肇
輩漢主厭爲所制與聶文進等謀誅之太后以爲不可
不聽俟弘肇等三人入朝伏甲士執而殺遺之行營指揮

使郭崇誦曹威殺郭威威舉兵反詔慕容彥超禦之屯
七里店承祐自出勞軍既陣彥超兵潰乃獨與三相及
從官數十人宿於寨旦將還宮至玄化門劉銖登門射
其左右遂回馬至趙村追兵至馬入民家爲亂兵所殺
漢亡二傳四年

五代周太祖

郭威邢州堯山人少坐事繫獄知遠出之每與謀議及
守河東以爲親將招吐谷渾殺白承福皆其謀也至由
晉絳入洛陽與有功焉漢主大漸詔受顧命無何晉樞
密使後趙思綰等反威漸次討平加侍中赴鄴爲留守

漢主殺史弘肇等遣使殺之劉銖因盡誅其子弟之在
都者威留養子榮守鄴自將大兵向京師漢主殂請于
李后迎立武寧節度使劉贊未至自立於澶州改國號
周弒贊於宋州以郭榮爲鎮寧節度使二年慕容彥超
反於兗州討平之三月以榮爲開封封尹晉王四年殂榮
嗣位元年敗北漢兵于高平遂攻晉陽不克而還二年
遣兵伐蜀取秦階成州三年取唐鄂滁揚泰舒蘄等州
四年取壽泗及濠州五年取楚州唐主請去帝號奉正
朔六年自將伐契丹取瀛莫易置霸雄州遂攻幽州有
疾乃還立子宗訓爲梁王生七年矣是年殂宗訓襲以

趙匡胤爲歸德節度使踰年以邊警出師至陳橋自立而還遷之房州封鄭王至宋太祖十四年卒周亡三傳九年

宋太祖皇帝

太祖趙匡胤初生洛陽夾馬營中赤光滿室異香經宿不散人謂之香孩兒營及長應募居郭威帳下柴世宗卽位拜殿前都虞候從征淮南擒南唐驍將皇甫暉姚鳳還拜殿前都指揮使又從世宗沿淮東下拔楚州屢立奇功世宗一日於文書囊中得木長三尺餘題云點檢作天子時張永德爲殿前都點檢乃命太祖代之世

宗崩于宗訓立會契丹入寇遣太祖禦之大軍發汴京殿前都指揮使苗訓善觀天文見日下復有一日黑光摩盪指示楚昭輔曰此天命也是夕次陳橋驛侍衛親軍指揮使高懷德趙彥徽等謀曰主上幼弱我輩出死力破敵誰則知之不如先冊點檢爲天子然後北征因以事白匡義及掌書記趙普共以事理譬曉諸將匡義太祖之弟也黎明將士直逼太祖寢所曰諸將無主願冊太尉爲皇帝太祖未及對其扶出廳事黃袍以加身矣衆卽羅拜呼萬歲挾之上馬擁逼還汴太祖乃攬轡誓諸將曰汝等自貪富貴立我爲天子當從我命太后

主上不得驚犯公卿不得侵凌朝市府庫不得侵掠皆
應曰諾遂肅隊而行乙巳入汴時方早朝范質聞變執
王溥手曰倉卒遣將吾輩之罪也溥噤不能對太祖進
登明德門令甲士歸營而自退居公署將士擁范質等
至遂奉太祖詣崇元殿行禪代禮國號宋遣使徧告諸
國藩鎮加官進爵有差以其弟光義爲殿前都虞侯趙
普爲樞密直學士尊母南郡夫人杜氏爲皇太后上欲
察羣情向背頗爲微行或諫之上笑曰帝王之興自有
天命周世宗見諸將方面大耳者殺之我終日侍側亦
不能害微行愈數曰有天命者任自爲之建隆二年皇

太后杜氏疾革召趙普入受遺命謂帝曰汝知所以得
天下乎正由柴氏使幼兒主天下也汝百歲後當傳位
光義光義傳光美光美傳德昭能立長君社稷之福也
帝泣曰敢不如教上自卽位以來先平荆南獲高繼冲
得州三縣十七繼平湖南降周保權得州十四監一縣
六十六上以湖南旣平思得通蠻情習地勢者以鎮撫
之辰州徭人秦再雄武健有奇畧上聞卽擢爲刺史使
自辟吏再雄至州訓士兵得三千人皆能被甲渡水歷
山飛斬捷如猿猱又親校二十人分使諸蠻以傳朝廷
懷徠之意於是荆襄無復邊患乃命潘美尹崇珂帥兵

攻南漢郴州克之初南漢內常侍邵廷瑁言於南漢主曰漢承唐亂居此五十餘年幸中國多故干戈不及今天下亂久矣亂久必治請飭兵備遣使通好於宋南漢主不以爲然至是始懼然是時上方謀下蜀未遑也上命王全斌劉光義崔彥進王仁贍曹彬等將步騎六千分道伐蜀全斌進次魏城蜀主命李昊草表請降前蜀之亡也降表亦昊爲之蜀人夜書其門曰世修降表李家官軍自發汴至受降凡六十六日得州四十五縣百九十八全斌之伐蜀也屬汴京大雪上設氊帷于講武殿衣紫貂裘帽以視事忽謂左右曰我被服如此體尚

覺寒念西征將士衝冒霜雪何以堪處即解裘帽遣使馳賜全斌仍諭諸將曰不能徧及也後王全斌崔彥進王仁贍等晝夜宴飲縱部下鹵掠蜀人苦之曹彬屢請旋師全斌等不從蜀兵憤怨遂作亂劫屬邑衆至十餘萬獲蜀文州刺史全師雄推以爲帥於是邛蜀眉雅及成都屬縣皆起兵以應師雄時成都城中降兵未遣者全斌慮其應賊誘而殺之賴劉光義曹彬進擊大破全師雄於新繁曹翰王仁贍又圍賊呂翰於嘉州翰棄城走是夕翰還結衆圍城約以三鼓而進曹翰知之令掌漏者止擊二鼓賊衆不集天明遂遁追襲又大破之

師雄走死蜀復平全斌等至具伏贖貨殺降之罪以潘美尹從珂伐南漢南漢主鋹出降凡得州六十縣二百四十一日從上幸講武池上賜以卮酒鋹疑有毒泣曰臣承祖父基業違拒朝廷罪固當誅陛下既待臣以不死願爲大梁布衣觀太平之盛上笑曰安有此乎命取銀酒自飲而別酌以賜鋹開寶七年命曹彬潘美曹翰等將兵十萬伐江南自王全斌平蜀多殺降卒帝每恨之至是戒彬曰江南之事一以委卿城陷之日李煜一門不可加害仍以劍授彬曰副將而下不用命者斬之潘美等皆失色彬自荆南發戰艦東下初唐池州人樊若水舉進士不第因謀歸宋乃於采石江上乘小舟載絲繩維南岸疾掉抵北岸以度江之廣狹因詣闕上書請造浮梁以濟帝然之遣石全振往荆湖造黃黑龍船數千艘又以大艦載巨竹組自荆渚而下議者謂江濶水深古未有浮梁而濟者帝不聽擢若水右贊善大夫先試於石牌口移置采石三日而成不差尺寸潘美帥兵渡江若履平地江南主危迫遣徐鉉求緩師鉉至言於帝曰李煜無罪煜以小事大如子事父柰何見伐帝曰爾謂父子爲兩家可乎鉉不能對而還踰月鉉復見帝帝按劍怒曰不須多言江南亦有何罪但天下一家

臥榻之前豈容他人鼾睡耶鉉惶恐辭歸煜率臣僚詣軍門請罪凡得州十九軍三縣一百八十吳越王俶與妻孫氏子惟濬入朝帝賜禮賢宅以居親幸宴之留兩月遣還三月至洛陽上欲畱都羣臣咸諫上曰遷河南未已終當居長安耳光義力請還汴乃不得已從之因歎曰不出百年天下民力殫矣上友愛光義每對近臣言光義龍行虎步他日必爲太平天子福德非吾所及也在位十七年壽五十

南宋高宗

高宗名構徽宗第九子初封康王元金人圍城遣之

出質金人疑非宗室更以蕭王代召之還八月復遣使金軍許割三鎮至磁州爲民所留詔以爲天下兵馬大元帥率師入衛至濟州而帝已北去遂卽位於建康元年金盡陷河北州郡二年盡陷京西州郡三年粘沒喝陷天長遂奔杭州苗傅劉正彥逼使傳位於子專賴張浚等討賊乃復位兀朮舉入寇如臨安及陷南京自滁和入江東復如越州十二月陷臨海遂走明州兀朮遣精騎追之乃乘樓船入海四年金人襲之於海又走温州四月韓世忠邀之江中大敗之金人自是不敢復渡江矣六年復秦州及熙鞏七年復潁昌及金州八年復

襄陽六郡九年湖湘平十三年定都臨安金遣使來詔
諭江南許歸河陝之地十五年復取之岳飛收復河南
州郡追兀朮至朱仙鎮詔班師十六年吳璘收復陝西
諸州詔班師割唐鄧商秦之地界金而樞密副使岳飛
十七年金人以袞冕來冊三十六年金主亮大舉南侵
至瓜洲爲下所殺三十七年內禪自稱太上皇又二十
五年殂先是元祐皇后降手書俾高宗嗣統其畧曰歷
年二百人不知兵傳序九君世無失德雖舉族有北轅
之釁而敷天同左袒之心乃眷賢王越居舊服漢家之
厄十世宜光武之中興獻公之子九人惟重耳之尚在
茲乃天意夫豈人謀

元太祖世祖

蒙古之先有曰孛端義兒母生二子而寡居夜寢屢有
光明照其腹又一乳生三子孛端義兒其季子也世奉
貢於遼金而總隸於韃靼至也速該勢愈盛生子鐵木
真紹興十七年也速該死鐵木真嗣立遂攻西夏大掠
而還至是建九旂日旗自號爲成吉思可汗侵擾雲中
九原連歲不休遂破大磧水以進攻西京取之凡破金
九十餘郡兩河山東數千里人民殺戮幾盡金帛子女
牛馬羊畜皆席捲而去繼又滅夏鐵木真死在位二十

二年年六十六廟號太祖蒙古窩濶台太宗立太宗與其弟拖雷率衆入陝西至封丘入鄭州攻汴城金主守緒知事急自經死遂以金之妃后宗室北去又攻洛陽取之金以亡蒙古蒙哥擊西域欽察諸部降之欽察去中國三萬里其人皆青目赤髮宋淳祐十一年元憲宗蒙哥立怒宋囚使臣命諸王不哥守和林自將南伐由西蜀以入直抵合州城下秋蒙古主死於合州忽必烈北還召竇默許衡至開平卽位還定都於燕命劉秉忠酌古今定內外官制後宋用賈似道不忠於宋擅拘留元使乃復起兵伐宋敗張世傑於焦山兵至厓山宋主

趙昺死之宋遂亡遣使窮河源行授時曆世祖既定天下從容問劉秉忠曰天下無不敗之家無不亡之國朕之天下後當誰得對曰西方之人也又問劉秉忠曰今之定都惟上都大都耳何處最佳劉秉忠曰上都國祚短民風淳大都國祚長民風淫遂定都燕之計命劉秉忠築元京城及開基得一巨穴內有紅頂蟲不知幾萬問劉曰此何祥也劉曰異時代國家者此也世祖思太祖創業艱難俾取所居之地青草一株置於大內謂之自儉草太祖起龍朔破大金世祖得襄陽平南宋天下

一統取大哉乾元之義國號大元取至哉坤元之義年

號至元元姓奇渥温世祖以上太祖太宗定宗憲宗四
主縱勛弘開國而宋皇御世實屬梗夷未集君統未建
國號及世祖始稱大元即帝位其賀表詔云太祖嫡孫
先皇母列以賢以長止予一人於是俯順輿情勉登大
寶在位三十五年

劉氏鴻書卷終

第五卷

世系部 六

春秋

齊桓

晉文

戰國

齊

楚

燕

韓

趙

魏

秦

偏霸

西楚霸王項羽

魏曹丕

吳孫權

鳥書

卷一 目錄

北齊高歡

北周宇文泰

後梁蕭詧

劉氏鴻書卷之十五

明宣城劉仲達纂輯

世系部

太史湯賓尹刪正

春秋

齊桓公

齊桓公名小白姜太公後釐公次子也初釐公同母弟夷仲早死其子曰公孫無知釐公愛之令其服秩比於太子諸兒釐公卒太子諸兒立是爲襄公始爲太子時嘗與無知鬪及立出無知次弟公子糾奔魯其母魯女也管仲召忽傅之次弟小白奔莒鮑叔傅之小白母衛

女也有寵於釐公小白自少好善及無知弑襄公而自立爲齊君大夫高傒及雍林人殺無知識立君高國先陰召小白於莒魯聞無知死亦發兵迎公子糾而使管仲別將兵遮莒道射中小白帶鉤小白佯死管仲使人馳報魯魯送糾者行益遲六日至齊則小白已入高傒立之是爲桓公桓公之中鉤佯死以誤管仲已而載温車中馳行亦有高內應故得先入立發兵拒魯與魯戰於乾時魯兵敗走齊兵襲掩魯歸道齊遺魯書曰子糾兄弟弗忍誅召忽管仲讐也請得而甘心焉不然將圍魯魯人遂殺子糾於笙瀆召忽自殺管仲請囚桓公發

兵攻魯心欲殺管仲鮑叔牙曰臣幸得從君君竟以之君之尊臣無以增君君將治齊卽高傒與叔牙是也且君欲霸王非管夷吾不可於是桓公從之乃佯爲召管仲欲甘心實欲用之管仲知之請往鮑叔迎受管仲及堂阜而脫桎梏桓公厚禮任政桓公旣得管仲與鮑叔隰朋高傒修齊國政連五家之兵設輕車魚鹽之利以贍貧窮祿賢能齊人皆說二年伐郟郟子奔莒初桓公亡時過郟郟無禮故伐之五年伐魯魯將帥敗魯莊公請獻遂邑以平桓公許與魯會柯而盟魯將盟曹沫以匕首劫桓於壇上曰反魯之侵地桓公許之已而曹沫

去七首北面就臣位桓公後悔欲無與魯地而殺曹沫
管仲曰夫劫許之而倍信殺之快一小忿而棄信於諸
侯失天下之援不可於是遂與曹沫三敗所亡地與魯
諸侯聞之皆附齊桓公於是始霸焉十四年陳厲公子
敬仲來奔齊桓公以爲工正田成子常之祖也二十三
年山陰燕莊公告急於齊桓公救燕遂拔山戎至於孤
竹桓公還燕莊公遂送桓公入齊境桓公曰非天子諸侯
相送不出境吾不可以無禮於燕於是分溝割燕君所
至與燕命燕君復修召公之政納貢於周如成康之時
諸侯聞之皆從齊二十七年魯閔公母曰哀姜桓公女

弟也哀姜淫於魯公子慶父慶父弑閔公哀姜欲立慶
父魯人更立僖公桓公召哀姜殺之二十八年衛文公
有狄亂告急於齊齊率諸侯城楚丘而立衛君二十九
年桓公與夫人蔡姬戲船中蔡姬習水蕩公公懼止之
不止怒歸蔡姬弗絕蔡亦怒嫁其女公怒率諸侯伐蔡
蔡潰遂伐楚楚成王興師問曰何故涉吾地管仲對曰
昔召康公命我先君太公曰五侯九伯汝實征之以夾
輔周室賜我先君履東至海西至河南至穆陵北至無
棣爾貢包茅不入王祭不供寡人是徵昭王南征不復
寡人是問楚曰貢之不入寡人之罪也敢不共命昭王

不復王其間諸水濱齊師進次於陘楚使屈完來盟齊師次於召陵公矜屈完以衆屈完曰君若以德綏諸侯誰敢不服若但以衆則楚方城以爲城漢水以爲池君亦安能爲乎乃與屈完盟而去過陳陳轅濤塗詐齊令出東方覺秋齊伐陳是歲晉殺太子申生二十五年夏會諸侯於葵丘周襄王使宰孔賜桓公文武胙彤弓矢大輅命無拜桓公欲許之管仲曰不可乃下拜受賜秋復會諸侯於葵丘公有駟色周使宰孔會諸侯頗有叛者晉侯後至遇宰孔宰孔曰齊侯驕矣可無行從之是歲晉獻公卒里克殺奚齊於卓子秦繆公以夫人入公子

夷吾爲晉君桓公討晉亂至高梁使隰朋立晉君還是時周室微惟齊楚秦晉爲強晉初與會獻公死國內亂秦繆公僻遠不與中國會盟楚成王初收荆蠻有之夷狄自置惟獨齊爲中國會盟而桓公能宣其德故諸侯賓會於是桓公稱曰寡人南伐至召陵望熊山北伐山戎離枝孤竹西伐大夏涉流沙東馬懸車登太行至卑耳山而還諸侯莫違寡人寡人兵車之會三乘車之會六九合諸侯一匡天下昔三代受命有何以異於此乎欲封泰山禪梁父管仲固諫不聽乃說桓公以遠方珍怪物至乃得封公乃止三十八年周襄王弟帶與戎狄

合謀伐周齊使管仲平戎於周周款以上卿禮管仲仲頓首曰臣陪臣安敢三讓乃受下卿禮以見三十九年周襄王弟帶來奔齊齊使仲孫請王爲帶謝襄王怒弗聽四十一年秦繆公虜晉惠公復歸之是歲管仲隰朋皆卒管仲病桓公問曰群臣誰可相者仲曰知臣莫若君公曰易牙何如對曰殺子以適君非人情不可公曰開方何如對曰倍親以適君非人情難近公曰豎刁何如對曰自宮以適君非人情難親仲死而桓公不用仲言近用三子三子專權四十二年戎伐周周告急於齊齊令諸侯各發卒戍周是歲晉文公重耳來桓公妻之

桓公好內多內寵如夫人者六人長衛姬生無詭少衛姬生惠公元鄭姬生孝公昭葛嬴生昭公潘密姬生懿公商人宋華子生公子雍管仲卒五公子皆求立冬十月乙亥桓公卒易牙入與豎刁因內寵殺群吏而立公子無詭爲君太子昭奔宋桓公病五公子各樹黨爭立及桓公卒遂相攻以故宮中莫敢棺桓公尸在床六十七日尸蟲出於戶十二月辛巳夜始殮殯無詭立三月死無謚次孝公元年八月乃葬桓公

晉文公

晉文公姬姓名重耳唐叔虞之後獻公子也獻公娶於

賈無子烝於武公妾齊姜生太子申生娶大戎胡姬生
重耳小戎子生夷吾伐驪戎得驪姬生奚齊其姊生卓
子重耳自少好士年十七有賢士五人曰狐偃趙衰顛
頤魏武子司空季子自獻公爲太子時重耳固已成人
矣獻公卽位重耳年二十一以驪姬嬖欲謀立奚齊故
居蒲城旣獻公殺太子申生使宦者寺人披趨殺重耳
重耳踰垣宦者逐斬其衣袪重耳遂奔狄狄其母國也
是時重耳年四十三賢士五人從亡至狄狄以季隗妻
重耳生伯儵叔劉以叔隗妻趙衰生盾居狄五年而晉
獻公卒里克已殺奚齊卓子重耳疑畏不敢入乃迎其

弟夷吾是爲惠公惠公畏重耳謀欲殺之趙衰曰狄非
可倚願徙大國將適齊謂季隗曰待我二十五年不來
而後嫁季隗笑曰我二十五年矣又如是而嫁則就木
焉請待子重耳去過衛衛出於五鹿乞食野人與之塊
重耳怒子犯曰土者有土也君其拜受之至齊齊桓公
妻之有馬二十乘重耳安之二歲而桓公卒會豎刁等
爲內亂齊孝公之立諸侯兵數至留齊凡五歲重耳愛
齊女毋去心趙衰舅犯乃於桑下謀行齊女侍者在桑
上聞之以告姜氏姜氏殺之而謂重耳曰子有四方之
志其聞之者吾殺之矣姜與子犯謀醉而遣之及曹曹

共公沐而觀其駢脅僂負羈之妻曰吾觀晉公子必得志於諸侯乃饋盤飧置璧公子受飧反璧及宋宋襄公贈之以馬二十乘及鄭鄭文公亦不禮焉叔詹諫曰男女同姓其生不蕃晉公子姬出也而至於今一也離外之患而天不靖晉國殆將啓之二也有三士足以上人而從之三也况天之所啓乎弗聽及楚楚子享之曰公子若反晉國則何以報不穀對曰子女玉帛則君有之羽毛齒革則君地生焉其波及於晉國者君之餘也其何以報君曰雖然何以報我對曰若以君之靈得反晉國晉楚治兵遇於中原其避君三舍若不獲命其左執鞭

弭右屬橐鞬以與君周旋子玉請殺之楚子乃送諸秦秦繆公納女五人懷嬴與焉初惠公負秦約爲秦所獲以太子圉爲質於秦秦以女妻之是爲懷嬴及子圉亡歸晉而懷嬴在秦至是乃以納重耳懷嬴奉匭沃盥重耳揮之懷嬴怒曰秦晉匹也何以卑我重耳懼降服而囚他日公享之請使衰從公子賦河水公賦六月趙衰曰君稱所以佐天子者命重耳重耳敢不拜晉獻公之喪秦繆公使人吊重耳且曰亡國恒於斯得國恒於斯不可失也孺子其圖之重耳對客曰君惠吊亡臣重耳身喪父死不得與於哭泣之哀以爲君憂父死之謂何

又敢有他志以辱君義繆公曰仁夫公子重耳乃送重耳反晉及河子犯請亡公子曰所不與舅氏同心者有如白水投其璧於河濟河圍遂如晉殺懷公於高粱呂卻畏偪將焚公宮而弑晉侯寺人披請見公使讓之既而公宮果火呂甥卻芮不獲公乃如河上秦伯誘而殺之晉侯逆夫人嬴氏以歸秦伯送衛士三千人實紀綱之僕初晉侯之豎頭須守藏者也其出也竊藏以逃盡用以求納之僕人以告公遽見之狄人歸季隗於晉而請其二子文公以女妻趙衰生原同屏括樓嬰趙姬使逆盾與其母子餘辭姬曰得寵而忘舊何以使人必逆

之固請許之來以盾爲才固請於公以爲嫡子而使其三子下之以叔隗爲內子而已下之從亡者介之推不言祿祿亦不及推曰獻公之子九人惟君在矣惠懷無親外內棄之天未絕晉必將有主主晉祀者非君而誰天實置之而二三子以爲己力不亦誣乎竊人之財猶謂之盜况貪天之功以爲己力乎與其母隱而歿晉侯求之不獲以綿上爲之田曰以志吾過且旌善人周襄王以母弟大叔帶之難出居於鄭狐偃曰莫如勤王且大義也繼文之業而宣信於諸侯今爲可矣晉侯右師圍溫左師逆王王入於王城取大叔於溫殺之於隰城

晉侯圍原命三日之糧退一舍而原降寺人勃鞞對曰
昔趙衰以壺飧徑餒而弗食遂使趙衰爲原大夫初晉
侯出亡宋襄公贈馬二十乘於是叛楚卽晉楚伐宋圍
緡宋告急先軫曰報施救患取威定霸於是乎在矣狐
偃曰楚始得曹而新昏於衛若伐曹衛楚必救之則齊
宋免矣於是乎出穀戍釋宋圍一戰而霸文之教也晉
侯侵曹伐衛入曹數其不用僂負羈而乘軒者三百人
且令無入僂負羈之宮而免其族報施也由是執曹伯
以畀宋人執衛侯歸之於京師楚子入居於申使申叔
去穀使子玉去宋曰無從晉師晉侯在外十九年矣而

果得晉國險阻艱難備嘗之矣民之情僞盡知之矣天
假之年而除其害天之所置其可廢乎子玉使宛春告
於晉師曰請復衛侯而封曹臣亦釋宋之圍子犯曰子
玉無禮哉不如私許復曹衛以攜之執宛春以怒楚旣
戰而後圖之公說乃拘宛春於衛且私許復曹衛曹衛
告絕于楚子玉怒從晉師晉師退軍吏曰以君辟臣辱
也且楚師老矣何故退子犯曰師直爲壯曲爲老豈在
久乎微楚之惠不及此退三舍辟之所以報也退三舍
晉侯夢與楚子搏楚子伏巳而監其腦是以懼子犯曰
吾我得天楚伏其罪吾且柔之矣楚師敗績子玉收其

卒而止故惟中軍不敗晉師三日館穀至於衡雍作王
宮於踐土獻楚於王策命晉侯爲侯伯賜之大輅之服
戎輅之服彤弓一彤矢百旅弓矢千秬鬯一鹵虎賁三
百人曰王謂叔父敬服王命以綏四國糾逖王慝晉侯
三辭從命曰重耳敢再拜稽首奉揚天子之不顯休命
城濮之戰祁瞞奸命司馬殺之師還濟河舟之僑先歸
殺之以殉於國君子謂文公其能刑矣會於温晉侯召
王以諸侯見且使王狩仲尼曰以臣召君不可以訓故
春秋書曰天王狩於河陽言非其地也晉侯有疾曹伯
之豎侯孺貨筮史使曰以曹爲解公說復曹伯晉侯使

醫衍酖衛侯甯俞貨醫使薄其酖不歿魯僖公爲之請
納玉於王爲晉侯乃釋衛侯初公亡過鄭鄭不禮之至
是與秦圍燭之武夜緹見秦伯曰秦晉圍鄭鄭旣知亡
矣若亡鄭而有益於君敢以煩執事越國以鄙遠君知
其難也焉用亡鄭以陪隣隣之厚君之薄也若舍鄭以
爲東道主行李之往來共其乏困君亦無所害且君嘗
爲晉君賜矣許君焦瑕朝濟而夕設版焉君之所知也
夫晉何厭之有旣東封鄭又欲肆其西封若不闕秦將
焉取之闕秦以利晉惟君圖之秦伯說與鄭人盟使杞
子逢孫楊孫戍之乃還子犯請擊之公曰不可微夫人

之力不及此因人之力而敝之不仁失其所與不知以
亂易整不武吾其還也亦去之蒐於清原作五軍以禦
狄趙衰爲卿楚鬬章請平於晉晉陽處父報之晉楚始
通文公卒將殯於曲沃出絳柩有聲如牛

戰國

田齊

田齊舜之後封於陳齊桓公時陳敬仲奔齊其子孫世
爲大夫執齊權至陳恒弒齊簡公恒之孫和遂篡齊齊
威王初卽位不治委政卿大夫九年之間諸侯並伐於
是威王召卽墨大夫語之曰自子之居卽墨也毀言曰

至然吾使人視卽墨田野闢人民給官無留事東方以
寧是子不事吾左右以求譽也封之萬家召阿大夫語
曰自子之守阿也譽言日聞然吾使人視阿田野不辟
人民貧苦昔日趙攻甄子弗救衛取薛陵子弗知是子
以幣厚吾左右以求譽也卽日烹阿大夫及左右嘗譽
者遂起兵西擊趙魏敗魏于濁津而圍惠王惠王請獻
觀以和趙人歸我長城于是齊國震懼人人不敢飾非
務盡其情齊國大治二十四年與魏王會田于郊魏王
曰寡人有徑寸之珠照車前後各十二乘者十枚威王
曰吾臣有檀子者使守南城則楚人不敢爲寇東取泗

上十二諸侯皆來朝吾臣有盼子者使守高唐則趙人不敢東漁于河吾吏有黔夫者使守徐州則燕人祭北門趙人祭西門從而從者七十餘家吾臣有種首者使備盜賊則道不拾遺將以此照千里豈特十二乘哉二十六年魏惠王圍邯鄲趙求救于齊齊因起兵擊魏大敗之桂陵于是齊強自稱爲王以令天下三十六年威王卒子宣王辟疆立宣王元年秦用商鞅周致霸于秦二年魏伐趙趙與韓親韓氏請救于齊齊因起兵使田忌田嬰將孫子爲師救韓以擊魏大敗之馬陵殺其將龐涓虜魏太子申其後三晉之王皆因田嬰朝齊王于

博望盟而去宣王喜文學游說之士自鄒衍淳于髡田駢慎到之徒七十六人皆賜列第爲上大夫不治而議論是以齊稷下學士復盛且數百千人齊欲伐魏淳于髡謂齊宣王曰韓子盧者天下之疾犬也東郭逡者海內之狡兔也韓子盧逐東郭逡環山者三騰山者五兔極于前犬廢于後犬兔俱罷各歿其處田父見之無勞勸之苦而擅其功今齊魏久相持以頓其兵弊其衆臣恐強秦大楚承其後有田父之功齊王懼謝將休士十九年宣王卒子湣王地立湣王三十六年爲東帝秦昭王爲西帝蘇代自燕來入齊見于章華東門於是齊去

帝復爲王秦亦去帝位三十八年伐宋宋王出亡齊南
割楚之淮北西侵三晉欲併周室爲天子泗上諸侯鄒
魯之君皆稱臣諸侯恐懼四十年燕秦楚三晉各出銳
師以伐齊燕將樂毅遂入臨淄潛王走莒楚使淖齒將
兵救齊因相齊潛王遂殺潛王而與燕共分齊之侵地
鹵噐潛王之遇殺其子法章變姓名爲莒太史敫家傭
太史敫女竒法章狀貌憐而常竊衣食之淖齒旣去莒
莒中人及齊亡臣相聚求潛王子欲立之法章懼其誅
已也久之乃敢自言於是莒人共立法章是爲襄王以
保莒城而布告齊國中曰王已立在莒矣襄王旣立立

太史氏女爲后是爲君王后生子建太史敫曰女不取
媒因自嫁非吾種也汗吾世終身不覩君王后君王后
賢不以不覩而失人子之禮襄王在莒五年田單以卽
墨攻破燕軍襄王入臨淄封田單爲安平君而相之襄
王卒子建立十六年君王后卒四十四年秦兵擊齊齊
王聽相后勝計不戰以兵降秦始君王后賢事秦謹與
諸侯信齊亦東邊海上秦日夜攻三晉燕楚五國各自
救以故王建立四十餘年不受兵君王后歿后勝相齊
多受秦間金勸王去從朝秦不修攻戰之備不助五國
攻秦秦以故得滅五國五國以亡齊王建欲入朝於秦

雍門司馬前曰所爲立王者爲社稷耶爲王耶王曰爲社稷司馬曰爲社稷立王王何以去社稷而入秦齊王還車而反卽墨大夫聞雍門司馬諫而聽之則以王爲可爲謀卽入見齊王曰齊地方數千里帶甲數十萬夫三晉大夫皆不便秦而在阿鄆之間者百數王收而與之十萬之衆使收三晉之故地卽臨晉之關可以入矣鄆郢大夫不欲爲秦而在城南下者百數王收而與之十萬之師使收楚故地卽武關可以入矣如此則齊威可立秦國可亡矣舍南面之稱制乃西面而事秦爲大王不取也齊王不聽秦使陳馳誘以齊王內之約與五百里之地齊王不聽卽墨大夫而聽陳馳遂入秦秦兵卒入臨淄民莫敢格者王建遂降遷於共處之松栢之間餓而歿故齊人怨王建不蚤與諸侯合從攻秦聽奸臣賓客以亡其國歌曰松耶栢耶往建共者客耶疾建用客之不詳也

楚

楚芊姓顓頊之後周成王封熊繹于楚後因周衰遂僭稱王春秋時莊王致霸傳至懷王六年楚使柱國昭陽將兵攻魏又移兵而攻齊齊王患之陳軫適爲秦使齊乃爲齊王往見昭陽說之昭陽遂引兵去十一年蘇秦

約從山東六國共攻秦楚懷王爲從長十六年秦欲伐齊而楚與齊從親秦惠王患之乃宣言張儀免相使儀南見楚王說楚絕齊請與商於地六百里卒爲秦所欺楚絕齊秦卒不與地三十年秦昭王遺楚王書曰寡人願與君王會武關面相約結盟而後去楚王患之昭雎曰王毋行而發兵禦守秦虎狼不可信懷王子子蘭勸王行曰柰何絕秦之歡心於是往會秦昭王詐令一將軍伏兵武關號爲秦王楚王至則閉武關遂與西至咸陽朝童臺如藩臣要以割巫黔中之郡楚王不許秦因留之楚大臣患之乃相與謀立項襄王而告于秦曰國有王矣秦昭王怒發兵攻楚大敗楚軍斬首五萬取析十五城而去二年楚懷王亡逃歸秦覺之遮楚道懷王恐乃從間道走趙趙不敢入楚王楚王欲走魏秦追至遂與秦使復之秦項襄王三年懷王病卒于秦秦歸其喪楚人憐之如悲親戚諸侯由是不直秦二十七年項襄王卒子考烈王立二十五年考烈王卒子幽王悍立幽王卒弟哀王立哀王庶兄負芻之徒因襲殺哀王而立負芻四年秦將王翦破楚軍于蕘殺將軍項燕五年王翦遂破楚虜楚王負芻滅楚名爲郡

燕

燕召公奭之後也國於幽州傳至文公卒子易王立齊
宣王因燕喪伐燕易王卒子燕噲立子之相燕南面行
王事而噲老不聽政顧爲臣國事皆決于子之二年國
大亂將軍市被與太子平謀攻子之齊湣王因而伐燕
燕君噲死子之亡燕人共立太子平是爲昭王昭王於
燕破之後卽位卑身厚幣以招賢者謂郭隗曰齊因孤
之國亂而襲破燕孤極知燕小力少不足以報然誠得
賢士以共國以雪先王之恥孤之願也先生視可者得
身事之郭隗曰王必欲致士先從隗始况賢于隗者豈
遠千里哉於是昭王爲隗改築宮而師事之樂毅自魏

往鄒衍自齊往劇辛自趙往士爭趨燕燕王弔死問孤
與百姓同甘苦二十八年燕國殷富士卒樂軼輕戰於
是遂以樂毅爲上將軍與秦楚三晉合謀伐齊齊兵敗
湣王出亡燕兵獨追北入至臨淄盡取齊寶齊城之不
下者獨聊莒卽墨其餘皆屬燕昭王三十三年卒子惠
王立疑毅使騎劫代之毅因亡走趙齊乃悉復得其故
城惠王七年卒武成王立武成王卒子孝王立孝王卒
子今王喜立立四年命相栗腹約歡趙以五百金爲趙
王酒還報曰趙壯者皆死長平其孤未壯可伐也王召
昌國君樂間問之對曰趙四戰之國其民習兵不可燕

王怒卒起二軍車二千乘使栗腹將而攻鄒唯獨大夫將渠謂燕王曰與人通關約交以五百金飲人之王使者報而反攻之不祥兵無成功燕王不聽自將偏軍隨之將渠引燕王綬止之曰王無以自往往無成功王蹴之以足將渠泣曰臣非自爲爲王也燕軍至宋子趙使廉頗將擊破栗腹於鄒樂間奔趙廉頗遂至燕圍其國燕相將渠處和趙乃解九年秦王政卽位燕太子丹質秦亡歸陰使荆軻襲刺秦王不中秦王怒使將軍王翦擊燕二十九年秦拔薊燕王亡徙居遼東斬丹以獻秦三十三年秦拔遼東虜燕王喜卒滅燕

韓

韓先與周同姓其苗裔事晉封于韓原曰韓武子世爲晉大夫至韓虔與趙魏共滅晉分其地始列爲諸侯傳至宣王謂繆畱曰吾欲兩用公仲公叔其可乎對曰不可晉用六卿而國分簡公用田成監止而簡公弑魏兩用犀首張儀而河西之外亡今王兩用之其多力者內樹黨其寡力者藉外權群臣或內樹黨以擅其主或外交以裂其地則王之國危矣十六年秦敗我修魚韓氏急公仲謂韓王曰與國非可恃也今秦之欲伐楚久矣王不如因張儀爲和于秦賂以一名都具甲與之南伐

楚此以一易二之計也韓王曰善乃警公仲之行將西
購于秦楚王聞之大怒召陳軫告之陳軫曰秦之欲伐
楚久矣今又得韓之名都一而具甲秦韓并兵而伐楚
此秦所禱祀而求也今已得之矣楚國必伐矣王聽臣
爲之警四境之內起師言救韓命戰車滿道路發信臣
多其車重其弊使信王之救已也縱韓不能聽我韓必
德王也必不爲鴈行以來是韓秦不和也兵雖至楚不
大病也爲能聽我絕和於秦秦必大怒以厚怨韓韓之
南夷楚必輕秦輕秦其應秦必不敬是因秦韓之兵而
免楚國之患也楚王深善之如其策韓王聞之大悅乃

止公仲之行公仲口不可夫以實伐我者秦也以虛名
救我者楚也王恃楚之虛名而輕絕疆秦之敵王必爲
天下大笑且楚韓非兄弟之國也又非素約而謀伐秦
也已有伐形因發兵言救韓此必陳軫之謀也韓王不
聽遂絕于秦秦因大怒益甲伐韓楚救不至二十一年
宣惠王卒襄王立襄王卒太子咎立是爲釐王二十三
年趙魏攻華陽韓告急於秦秦不救韓相國使陳策說
秦相穰侯穰侯乃發兵救韓敗趙魏于華陽之下是歲
釐王卒子桓惠王立十年秦擊太行上黨郡守以上黨
降趙二十九年桓惠王卒子王安立王安九年秦虜王

安盡入其地爲潁川郡韓遂亡

趙

先是趙夙爲晉大夫其子衰有功於晉故子孫世爲大夫傳至趙鞅傳子無卹初智宣子將以瑤爲後智果曰不如宵也瑤之賢於人者五其不逮者一也美鬚長大則賢射御足力則賢伎藝畢給則賢巧文辯慧則賢彊毅果敢則賢如是而甚不仁夫以其五賢陵人而以不仁行之其誰能待之若果立瑤也智宗必滅弗聽趙簡子之子長曰伯魯幼曰無恤將置後不知所立乃書訓戒之辭於二簡以授二子曰謹識之三年而問之伯魯

不能舉其辭求其簡已失之矣問無恤誦其辭甚習求其簡出諸神中而奏之於是簡子以無恤爲賢立以爲後簡子使尹鐸爲晉陽請曰以爲繭絲乎抑爲保障乎簡子曰保障哉尹鐸損其戶數簡子謂無恤曰晉國有難而無以尹鐸爲少無以晉陽爲遠必以爲歸及智宣子卒智襄子爲政與韓康子魏桓子宴於藍臺智伯戲康子而侮段規智國諫曰主不備難必至矣智伯請地於韓康子康子欲弗與段規曰智伯好利而復不與將伐我不如與之彼狃於得地必請於他人他人不與必嚮之以兵然則我得免於患而待事之變矣康子曰善

乃與之智伯悅又求地於魏桓子桓子欲弗與任章問
焉桓子曰無故任章曰無故索地諸大夫必懼吾與之
地智伯必驕彼驕而輕敵此懼而相親以相親之兵待
輕敵之人智氏之命必不長矣不如與之以驕智伯然
後可以擇交而圖之柰何獨以吾爲智氏質乎桓子曰
善亦與之智伯又求蔡臯狼之地於趙襄子襄子弗與
智伯怒帥韓魏之甲以攻之襄子乃走晉陽三家圍而
灌之城不浸者三版沈竈產龜民無叛意智伯行水魏
桓子御韓康子驂乘智伯曰吾乃今知水可以亡人國
也桓子肘康子康子履桓子之跗以汾水可以灌安邑

澤水可以灌平陽也絺疵謂智伯曰韓魏必反矣智伯
曰子何以知之對曰以人事知之夫從韓魏而攻趙趙
亡難必及韓魏矣今約勝趙而三分其地城降有日而
二子無喜志有憂色是非反而何明日趙襄子使張孟
談潛出見二子二子乃與約爲之期日而遣之趙襄子
夜使人殺守隄之吏而決水灌智伯軍智伯軍亂韓魏
翼而擊之襄子將卒犯其前大敗其衆遂殺智伯滅其
族而分其地唯輔果在無恤傅子籍是爲烈侯與韓魏
共分晉地都邯鄲四傳至武靈王武靈王八年五國相
王趙獨否曰無其實敢處其名乎令國人謂已曰君十

鴻書
六年王游大陵夢見處女鼓琴而歌詩曰美人熒熒兮
顏若茗之榮命乎命乎曾無我羸異日王飲酒樂數言
所夢想見其狀吳廣聞之因夫人而內其女娃羸孟姚
也孟姚既寵立爲惠后生子何十九年王北畧中山之
地至房子遂之代北至無窮西至河登黃華之上召樓
緩謀曰我先王因世之變以長蕃之地今中山在我腹
心北有燕東有胡西有林胡樓煩秦韓之邊而無彊兵
之救是亡社稷柰何夫有高世之名必通

有遺俗之累吾欲胡服樓緩曰善遂胡服招騎射二十
六年攻中山攘地北至燕代西至雲中九原二十七年
大朝於東宮傳國立王子何以爲王王廟見禮畢出臨
朝大夫悉爲臣肥義爲國相并傳王是爲惠文王惠文
王之母有寵故武靈王廢長子章而立之而自號爲主
父主父欲令子主治國而身胡服將士大夫西北畧胡
而欲從雲中九原直南襲秦於是詐自爲使者入秦秦
昭王不知已而恠其狀甚偉非使臣之度使人逐之而
主父馳已脫關矣審問之乃主父也秦人大驚趙惠文
王二年主父封長子章爲代安陽君又使田不禮相章

章卽以其徒與田不禮作亂殺肥義公子成與李兌起四邑之兵入距難殺公子章及田不禮而主父遂餓死三十三年惠文王卒太子丹立是爲孝成王四年韓氏上黨守馮亭使者至曰韓不能守上黨入之於秦其吏民皆安爲趙不欲爲秦有城市邑十七願再拜入之趙王大喜召平陽君豹告之對曰聖人甚禍無故之利王曰人懷吾德何謂無故對曰夫秦蠶食韓氏地中絕不令相通故自以爲坐而受上黨之地也韓氏所以不入於秦者欲嫁其禍於趙也秦服其勞而趙受其利雖強大不能得之於小弱

小弱顧能得之於强大乎豈可謂非無故之利哉王曰今發百萬之軍而攻踰年歷歲未得一城也今以城市邑十七幣吾國此大利也乃令楚勝受地發兵取上黨廉頗將軍軍長平七年廉頗免而趙括代將秦人殺趙括坑降卒四十萬圍邯鄲趙使毅諒至秦秦王曰趙豹平原君數欺寡人趙能殺此二人則可毅諒曰趙豹平原君親寡君之母弟也猶大王之有葉陽涇陽君也大王以孝治聞於天下衣服之便於體膳啗之嫌於口未嘗不分於葉陽涇陽君葉陽君涇陽君之車馬衣服無非大王之服御者今使臣受大王之令以還報敝邑之

君畏懼不敢不行無乃傷葉陽君涇陽君之心乎秦王
曰諾長平敗後平原君謂馮忌曰吾欲出兵攻燕何如
馮忌對曰不可夫秦乘七勝之威戰於長平之下因以
其餘兵圍邯鄲之城趙以亡敗之餘衆收破軍之敝守
而秦兵罷於邯鄲趙守而不可拔然者攻難而守者易
也今趙非有七克之威也而燕非有長平之禍也今七
敗之禍未復而欲以罷趙攻彊燕是使弱趙爲彊秦之
所以攻而彊燕爲弱趙之所以守而彊秦以休兵承趙
之敝故臣未見其可也二十年秦王政初立明年孝成
王卒悼襄王立至幽繆王遷七年秦人攻趙趙殺其大

將李牧而王遷降邯鄲入秦

魏

魏之先畢公高之後畢公佐武王有功封于畢其苗裔
曰畢萬事晉獻公獻公滅魏以封畢萬子孫遂以國爲
氏傳至魏斯與韓趙共滅晉而分其地魏安釐王四年
秦破魏及韓趙殺十五萬人走魏將芒卯魏將段干子
請於秦割南陽以和蘇代謂魏王曰欲璽者段干子也
欲地者秦也今王使欲地者制璽欲璽者制地魏氏地
不盡則不知已且夫以地事秦譬猶抱薪救火薪不盡
火不滅王曰雖然事始已行不可更矣對曰王獨不見

夫博之所以貴梟乎便則食不便則止今王曰事始已
行不可更是何王之用智不如用梟也三十一年秦王
政初立三十四年安釐王卒景湣王立十五年景湣王
卒子王假立王假三年秦灌大梁虜王假遂滅魏以爲
郡縣

秦

秦之先秦仲周宣王時爲大夫誅西戎西戎殺秦仲秦
仲子五人長曰莊公周宣王乃召莊公昆弟五人與兵
七千人使伐西戎破之於是復與秦仲後及其先大駱
地大丘并有之爲西陲大夫莊公卒子襄公代立西戎

犬戎與申侯伐周殺幽王驪山下而秦襄公將兵救之
戰甚力有功周避犬戎難東徙雒邑襄公以兵送周
王平王封襄公爲諸侯賜之岐以西之地襄公於是始
國與諸侯通使聘享之禮數傳至穆公又至獻公獻公
元年止從歿二十一年與晉戰於石門斬首六萬天子
賀以黼黻獻公卒子孝公立孝公元年河山以東疆國
六淮泗之間小國十餘楚魏與秦接界時周室微諸侯
力政爭相并秦僻在雍州不與中國之會盟夷翟遇之
孝公於是布惠振孤寡招戰士明功賞下令國中曰昔
我穆公自岐雍之間修德行武東平晉亂以河爲界西

霸戎翟廣地千里天子致伯諸侯畢賀爲後世開基會
往者厲躁簡公出子之不寧國家內憂未遑外事三晉
攻奪我先君河西地諸侯卑秦醜莫大焉獻公卽位鎮
撫邊境徙治櫟陽且欲東伐復穆公之故地修穆公之
政令寡人思念先君之意常痛于心賓客羣臣有能出
奇計彊秦者吾且尊官與之分土於是乃出兵東圍陝
城西斬戎之獮王衛鞅聞是令下西入秦因景監求見
孝公三年衛鞅說孝公變法修刑政內務耕稼外勸戰
歿之賞罰誘三晉人耕稼於內使秦人力戰於外孝公
善之卒用鞅法二十四年孝公卒子惠文君立是歲誅

衛鞅二十八年惠王卒子武王立武王有力好戲力士
任鄙烏獲孟說皆至大官王與孟說舉鼎絕膺歿武王
無子立異母弟是爲昭襄王昭王五十一年秦使將軍
摎攻西周西周君走來自歸盡獻其邑三十六城五十
六年昭襄王卒子孝文王立孝文王除喪卽位三日卒
子莊襄王立四年莊襄王卒子政立是爲秦始皇帝

偏霸

西楚霸王項羽

項籍字羽下相人也初起兵年二十四其季父梁梁父
卽楚名將項燕者也家世楚將封于項故姓項氏籍少

時學書不成去學劍又不成梁怒之籍曰書足記姓名而已劍一人敵不足學學萬人敵耳梁嘗殺人與籍避讐吳中吳中賢士大夫皆出梁下秦始皇帝東遊會稽度浙江梁與籍俱觀籍曰彼可取而代也籍身長八尺二寸力能扛鼎才氣過人秦二世元年擊殺會稽守殷通遂舉吳中兵使人收下縣得精兵八千人渡江而西聞陳嬰已下東陽使使欲與連和嬰乃以兵屬梁英布蒲將軍亦以其兵屬焉凡六七萬人軍下邳沛公亦從沛往焉居鄴人范增年七十素好奇計往說梁曰秦滅六國楚最亡罪自懷王入秦不反楚人憐之至今故南

公稱曰楚雖三戶亡秦必楚今陳勝首事不立楚後其勢不長今君起江東楚蠶起之將皆爭附君者以君世世楚將爲能復立楚之後也于是梁乃求楚懷王孫心立爲楚懷王自號武信君救齊東阿大破秦軍至雍丘又大破秦軍斬李由梁再破秦益輕秦有驕色秦乃悉起兵益章邯夜銜枚擊楚大破之定陶梁歿章邯乃渡河北擊趙楚懷王召宋義計事說之因以爲上將軍羽爲魯公爲次將范增爲末將諸別將皆屬號卿子冠軍救趙至安陽留四十六日不進羽謂宋義曰今秦軍圍鉅鹿疾引兵渡河楚擊其外趙應其內破秦軍必矣宋

義曰不然擊輕撓銳我不如公坐籌運策公不如我因
下令軍中曰猛如虎狠如羊貪如狼彊不可令者斬遣
其子襄相齊身送之無塩飲酒高會天寒大雨士卒凍
饑羽晨朝宋義卽其帳中斬義頭出令軍中使桓楚報
命于王王因使使立羽爲上將軍乃遣當陽君蒲將軍
將卒二萬人渡河救鉅鹿戰少利陳餘復請命羽乃引
兵渡河已渡皆沉船破釜燒廬舍持三日糧示士必
死無還心與秦軍遇九戰絕甬道大破之殺蘇角虜王
離涉間不降自燒殺當是時楚兵冠諸侯諸侯軍救鉅
鹿者十餘壁莫敢縱兵及楚擊秦諸侯皆從壁上觀楚

戰士無不一當十呼聲動天地諸侯軍人人惴恐于是
楚已破秦軍羽見諸侯將入轅門膝行而前莫敢仰視
羽繇是始爲諸侯上將軍兵皆屬焉兵行畧地至河南
遂西到新安夜擊坑秦軍二十餘萬人至函谷關有兵
守不得入羽大怒使當陽君擊關羽遂入至戲西鴻門
期旦日與沛公軍合戰羽季父項伯素善張良良時從
沛公項伯夜以語良良與俱見沛公因伯自解于羽明
日沛公從百餘騎至鴻門謝項王因畱沛公飲項莊拔
劍起舞項伯常以身翼蔽沛公得不擊須臾沛公起如
廁因招樊噲出乃令張良畱謝謹奉白璧一雙再拜獻

大王足下玉斗一雙再拜奉大將軍足下項王則受璧置之坐上亞夫受玉斗置之地拔劍撞而破之曰唉豎子不足與謀奪項王天下者必沛公也吾屬爲虜矣後數日項王乃屠咸陽殺秦降王子嬰燒其宮室火三月不滅收其寶貨畧其婦女而東秦民大失望于是韓生說羽都關中羽乃曰富貴不歸故鄉如衣錦夜行韓生曰人謂楚人沐猴而冠果然項王聞之烹韓生乃陽尊懷王爲義帝故立沛公爲漢王王巴蜀而三分關中王秦降將以距塞漢道已自立爲西楚霸王王梁楚地九郡都彭城諸侯各就國及漢王還定三秦張良狗韓乃

遺項王書曰漢王失職欲得關中如約卽止不敢言又以齊梁反書遺項王項王以此故無西意而北擊秦項王至城陽田榮亦將兵會戰榮不勝走被殺項王遂北燒夷齊城郭室屋所過殘滅齊人相聚而畔之于是田榮弟橫收得亡卒數萬人反城陽項王因留連戰未能下以故漢王得劫五諸侯兵凡五十六萬人東伐楚項王聞之卽令諸侯擊齊而自以精兵三萬人晨擊漢軍殺漢卒十餘萬皆入睢水漢王乃與漢十騎遁去項王擊絕漢甬道漢王食乏請和項王欲聽之范增曰漢易與耳今不取後必悔之項王乃急圍滎陽漢王患之乃

與陳平金以間楚君臣范增行未至彭城疽發背歿于
是漢將紀信詐爲漢王出降故漢王得以數十騎從西
門出項王卽引兵南漢王堅壁不與戰是時彭越渡睢
與項聲薛公戰下邳殺薛公項王復東擊彭越漢王遂
引兵北軍成皐項王已破走彭城復引兵西下滎陽城
進拔成皐漢王獨與滕公出北渡河從張耳韓信軍留
上使盧縮劉賈渡白馬津入楚地佐彭越共擊破楚軍
燕郭西燒其積聚攻下梁地十餘城項王聞之謂大司
馬曹咎曰謹守成皐我十五日必定梁地於是引兵東
四年項王擊陳留外黃外黃不下數日降項王悉令男

子十五以上詣城東欲坑之外黃令舍人兒年十三在
說項王曰彭越强劫外黃外黃恐故且降以待大王大
王至又皆坑之百姓豈有歸心哉從此以東梁地十餘
城皆恐莫肯下矣項王然其言乃赦外黃當坑者漢果
數挑楚軍戰大破之復入成皐項王聞破則引兵還使
人謂漢王曰天下洶洶徒以吾兩人願與挑戰決雌雄
毋徒罷天下父子爲也漢王笑謝曰吾寧鬪智不能鬪
力項王令壯士出挑戰漢有善騎射者樓煩楚挑戰三
合樓煩輒射殺之項王大怒自被甲持戟挑戰樓煩欲
射項王瞋目叱之樓煩目不能視手不能發走還入壁

不敢復出於是項王與漢王相與臨廣武間而語漢王
數項王十罪項王怒伏弩射漢王漢王傷走入成皐時
彭越數反梁地絕楚糧食而韓信已破齊且欲擊楚矣
漢王乃使侯公說項王與約中分天下割鴻溝而西者
爲漢東者爲楚已約項王解而東五年漢王背約進兵
追項王與齊梁諸侯皆大會項王壁垓下軍少食盡漢
率諸侯兵圍之數重項王夜聞漢軍四面皆楚歌乃驚
曰漢皆已得楚乎是何楚人多也起飲帳中有美人姓
虞氏常幸從駿馬名騅常騎乃悲歌慷慨自爲歌詩曰
力拔山兮氣蓋世時不利兮騅不逝騅不逝兮可奈何

虞兮虞兮柰若何歌數曲美人和之項王泣下數行左
右皆泣莫能仰視於是項王遂上馬戲下騎從者八百
餘人夜直潰圍南出平明渡淮騎能屬者百餘人至陰
陵迷失道問一田夫田夫給曰左左乃陷大澤中以故
漢追及之項王復引而東至東城乃有二十八騎項王
自度不能脫謂其騎曰吾起兵至今八歲矣身經七十
餘戰所當者破所擊者服未嘗敗北遂霸有天下然今
卒困于此此天亡我非戰之罪也今日固決死願爲諸
君決戰必三勝之於是引其騎以爲四隊四嚮漢軍圍
之數重項王謂其騎曰吾爲公取彼一將令四面騎馳

下期山東爲三處於是項王大呼馳下漢軍皆披靡遂
殺漢一將是時楊喜爲郎騎追項王項王還叱之喜人
馬俱驚辟易數里與其騎會三處漢軍不知項王所在
分軍爲三復圍之項王乃馳復斬漢一都尉殺數十百
人復聚其騎亡兩騎乃謂其騎曰何如騎皆伏曰如大
王言於是遂引東欲渡烏江烏江亭長艤船待謂之曰
江東雖小地方千里衆數十萬亦足王也願大王急渡
今獨臣有船漢軍至亡以渡項王笑曰乃天亡我何渡
爲且籍與江東子弟八千人渡而西今無一人還縱江
東父兄憐而王我我何面目見之縱彼不言籍獨無愧
于心乎謂亭長曰吾知公長者也吾騎此馬五歲所當
無敵嘗一日千里吾不忍殺以賜公乃令騎皆去馬步
持短兵接戰獨項王所殺漢軍數百人身亦被十餘創
顧見漢騎司馬呂馬童曰若非吾故人乎馬童面之指
王翳曰此項王也項王乃曰吾聞漢購我頭千金邑萬
戶吾爲若德乃自剄亡翳取其頭餘騎相蹂踐爭項王
相殺者數十人最後揚喜呂馬童卽中呂勝楊武各得
其一體五人皆封列侯漢王乃以魯公號塋項王于穀
城爲發哀泣之而去

魏曹丕

文帝諱丕代漢都鄴徙洛陽在位七年壽四十臨終以
司馬懿受遺詔輔政丕同母弟植好學多才見寵於武
帝幾奪嫡而丁儀丁廙楊修等與植善又爲之羽翼故
文帝立而怨之殺丁儀丁廙及其男口植與諸兄弟並
遣就國卞太后親告丕曰女旣殺我任城不得復害東
阿東阿植也黃初二年監國謁者灌均希指奏植醉酒
悖慢劫脅使者貶爵安鄉侯又改鄴城侯其餘侯王皆
寄空名老兵百餘人爲之守備皆願爲布衣而不能得
法旣峻急伺察者益衆故諸侯王過惡日聞獨北海王
衮謹身好學未嘗有過監國防輔相與言曰受詔察王

有過當奏有善亦宜以聞遂共表陳之衮聞大驚曰修
身自守常人之行耳而諸君乃以上聞是適足以增其
負累也孫盛曰異哉魏之封建也不度先王之典不思
藩屏之重違敦睦之風背維城之義漢初之封或權侔
人主雖云不度時勢然也魏氏諸王陋同匹夫雖懲七
國矯枉過也六合未一而彫剪枝幹委權異俗勢同虜
木危若巢幕不嗣忽諸非天喪也五等之制萬世不易
六代興亡曹叅論之詳矣余謂曹公屠鄴丕卽入熙室
而奪其妻使曹公有今年破賊爲阿奴之嫌卞太后往
問不疾見左右皆昔年侍者因問左右何時過對云正

伏魄時過太后遂不入而罵曰狗鼠不食女餘歿固應爾至山陵亦竟不臨然則不之喪心久矣又何有於諸王又何有於經國之長慮乎縱無司馬懿之奸亦難久有魏也而况司馬父子兄弟終日睨其側哉

吳孫權

權父孫堅富春人也董卓亂堅舉兵荊州初平三年劉表遣黃祖射殺之初堅娶錢塘吳氏生四男策權翊匡堅歿策嗣遂霸江東策歿權代之建安七年秋曹操下書責孫權任子權引周瑜詣吳夫人前定議遂不送質十三年權西擊黃祖屠其城祖挺身走追斬之是時曹

操遺權書曰近者奉辭伐罪旌麾南指劉琮束手今治水軍八十萬衆願與將軍會獵於吳權以示臣下莫不駭震失色權用周瑜魯肅計與劉備并力破操於赤壁操大敗十五年冬周瑜卒十七年權作石頭城徙治秣陵改秣陵爲建業秋九月作濡須塢冬十月曹操東擊孫權十八年春曹操進軍濡須口號步騎四十萬攻破孫權江西營權率衆士往禦之相守月餘操見其舟船器仗軍伍整肅歎曰生子當如孫仲謀如劉景昇兒子豚犬耳權爲牋與操說春水方生公宜速去又別紙言足下不歿孤不得安操與諸將曰孫權不欺乃引兵還

吳于二年春魏王操軍於居巢孫權保濡須操進攻之
正月操又引軍還冬十月魯肅卒孫權以呂蒙兼漢昌
太守代之二十四年秋權遣呂蒙襲公安江陵獲關羽
及子平於章鄉斬之十二月魏王操表孫權爲驃騎將
軍假節領荊州牧封南昌侯魏王丕黃初元年孫權遣
使奉獻二年孫權自公安徙都鄂更名鄂曰武昌秋七
月孫權遣使稱臣于魏魏遣太常邢貞奉策卽拜孫權
爲吳王吳中郎將徐盛忿顧謂同列曰盛等不能奮身
出命爲國家并許洛吞巴蜀而令吾君與貞盟不亦辱
乎因涕泣橫流貞聞之謂其徒曰江東將相如此非久

下人者也吳王遣中大夫南陽趙咨入謝魏王問曰吳
王何等主也對曰聰明仁智雄畧之主也魏王問其狀
對曰納魯肅於凡品是其聰也拔呂蒙於行陣是其明
也獲于禁而不害是其仁也取荊州兵不血刃是其智
也據三州虎視天下是其雄也屈身於陛下是其畧也
魏王曰吳可征否對曰大國有征伐之兵小國有禦備
之固魏王曰吳如大夫幾人對曰聰明特達者八九十
人如臣之比車載斗量不可勝數魏明帝泰和三年吳
王卽皇帝位太赦以黃龍見改元黃龍九月遷都建業
以陸遜輔太子登守武昌黃龍二年明年又改嘉禾三

年六年以赤烏見于前殿改元赤烏是年魏主獻卒太子芳立十三年吳主廢其太子和立子亮爲太子太元二年權薨年七十一

北齊高歡

高歡字賀六渾歡累世北邊故其俗遂同鮮卑歡深沈有大度孝昌元年歸爾朱榮榮坐歡於牀下屏左右訪以時事歡曰方今天子愚弱太后淫亂孽寵擅命朝政不行以明公雄武乘時奮發討奸臣清帝側成霸業此賀六渾之意也榮大悅及魏明帝暴崩榮遂入洛將篡位歡請鑄像卜之鑄不成乃止遂立孝莊乃以歡爲晉

州刺史無幾孝莊誅榮爾朱兆入洛執莊帝以北歡乃以書諭兆言不宜執天子兆不納殺帝而與爾朱世隆等立長廣王曄時天光據關右兆據并州仲遠據東郡各擁兵爲暴天下苦之兆患之問計於歡歡曰六鎮反殘不可盡殺宜選王心腹私將統之若有犯者罪其帥則罪者寡兆曰善誰可行賀拔允時在坐勸請用歡歡奉歐允曰天下安置在王而允敢誣罔如此兆以歡爲誠遂委之歡恐兆醒後致疑遂出宣言受委統州鎮兵可集汾東受令乃建牙陽曲川陳部分於是士衆感悅咸願附從魏普泰元年歡遂據冀州是時爾朱度律廢

元驛而立節閔帝欲羈縻歡乃白封歡爲勃海王徵使
入覲歡辭乃詐爲書言爾朱兆將以六鎮人配契胡爲
部曲又爲并州符徵兵討步落稽發卒萬人將遣孫騰
等僞請留五日已又再留及行歡親送之雪涕執別人
人號哭歡喻之曰與爾俱失鄉客義同一家不意乃爾
徵召直向西已當歿後軍期又當歿配國人又當歿奈
何衆曰唯反爾歡曰反是急計須推一人爲主乃可衆
願奉歡歡曰以吾爲主不得欺漢兒不得歿軍令生歿
任吾則可衆皆頓頽曰歿生唯命歡乃椎牛饗士建義
於信都抗表罪狀爾朱兆永熙元年進拔鄴城爾朱兆

歡曰我昔親聞天柱計汝在戶前立豈得言不反邪且
以君殺臣何報之有乃合戰兆大敗奔并州歡至洛陽
廢節閔而立修修卽位授歡大丞相天柱大將軍帥師
北伐爾朱兆大掠晉陽北保秀容爾朱兆旣至秀容分
兵守險歡揚聲討之師出復止如是數四歡揣其歲首
當宴會遣竇泰以精騎馳之一日一夜行三百里攻破
之兆自縊歿旣而魏帝與歡有隙奔長安依宇文泰歡
入洛乃立清河王世子善見是爲孝靜帝魏於是始分
爲二孝靜遷鄴歡還晉陽自是軍國政務皆歸於歡太

平五年歡卒

北周宇文泰

宇文泰字黑獺少有大度輕財好施先隨父肱在鮮于修禮軍後隨爾朱榮遷晉陽又以別將從賀拔岳討北海王顥既而從岳入關高歡既專朝政泰請往觀歡歡見之曰此小兒眼目異常將留之泰求復命乃還謂岳曰高歡豈人臣也逆謀未發者憚公兄弟耳今若移軍近隴扼其要害西輯氐羗北撫沙塞還軍長安匡輔魏室此桓文之舉也岳大悅遂引軍西次平涼表泰爲夏州刺史魏永熙三年賀拔岳欲討曹泥遣使至夏州與

泰謀泰曰曹泥孤城未足爲憂矣莫陳悅貪而無信宜先圖也岳不聽遂與悅俱討泥至河曲果爲悅所害衆散還平涼未知所屬趙貴稱泰於衆而令赫連達馳至夏州告泰泰乃率帳下輕騎馳赴之泰志在討悅而未

有朝旨大衆未集因與諸將刑牲盟誓同獎王室魏帝詔泰爲大都督統賀拔岳軍討悅泰遂引兵上隴追悅斬之傳首洛陽時歡已有異志故魏帝深倚泰歡逼京師魏帝親總六軍屯河橋泰謂左右曰高歡數日行八九百里曉兵者所忌正須乘便擊之會元斌之斛斯椿爭權鎮防不守魏帝遂輕騎入關都長安魏帝閨門無

禮從妹不嫁者三人平原公主明月從入關泰使人殺之魏主不悅由是與泰有隙飲酒遇醜而殂泰乃立南陽王寶炬是爲文帝大統二年高歡來攻自蒲津濟河泰迎戰於沙苑歡大敗走九月東魏北豫州刺史高仲密以虎牢來降泰帥軍應之及高歡戰於邙山大敗而還十三年高歡卒侯景叛東魏降梁十六年而高洋篡東魏稱帝國號齊泰以齊主稱帝伐之自弘農爲橋濟河至建州齊主自將出頓東城泰聞其軍容嚴盛歎曰高歡不歿矣乃還十七年魏主寶炬卒太子欽立二年泰廢魏主置之雍州立其弟齊王廓未數月欽爲泰所殺是年泰遣于謹平江陵三年泰北巡卒于涇州世子覺嗣位泰能駕馭英豪得其力用質素明達崇儒好古凡所施設皆倣古爲之

後梁蕭詧

蕭詧昭明大子長子昭明卒當爲太孫武帝不立以爲州刺史封岳陽王因湘東攻之急求掾于魏請爲附庸魏封爲梁王梁武殂命之襲位詧固辭越三年引魏兵伐江陵克之乃徙詧江陵使之稱帝地僅二百里以兵守之八年傳子巋益以基平都三州三十一年傳子琮踰年朝隋隋廢之爲莒公

